

KANTONALNA
PRIVREDNA
KOMORA TUZLA

BROJ 9 i 10/19,
septembar/oktobar
2019. godine



KOMORSKI INFORMATOR




41. SAJAM GRAĐEVINARSTVA
U BUDVI



ODRŽAN 2. SAJAM „BOSP-
EXPO“ U BRČKOM



ODRŽAN 17. MEĐUNARODNI
SAJAM EKOLOGIJE 'EKOBIS
2019'



18. MEĐUNARODNI
POLJOPRIVREDNI SAJAM
„INTERAGRO“ BJELJINA



Komorski informator Uvod

Poštovani čitaoci!



Komorski informator za period septembar/oktobar 2019. godine donosi niz zanimljivih informacija, jubileja, skupova, najava događaja... Evo nekoliko naslova koje preporučujemo:

- Iz Udruženja za trgovinu, ugostiteljstvo i turizam - „Neophodna kvalitetnija saradnja sa Službom za zapošljavanje i P/GKFBiH“
- 60 godina postojanja Termoelektrane Tuzla - „Ponos ne samo Tuzle već i cijele države“
- FCL: obilježavanje velikog jubileja - 45 godina Fabrike cementa Lukavac
- TTU spreman za izgradnju Bloka 7
- Iz Vlade TK - Prijem za članove Uprave JP „Elektroprivreda BiH“
- Iz rudnika “Kreka” - Ugovor o koncesiji nužno je pokriti bankovnom garancijom
- Iz Solane dd Tuzla - Dan solara i 134 godine rada Solane Tuzla
- Iz GIKIL-a - Sigurniji rad postrojenja! - Nova predsjednica NO, novi gen. direktor
- Menprom ispunio visoke zahtjeve - “Menpromu” certifikat IFS
- “Privreda TK” u Budvi - 41. sajam građevinarstva u Budvi
- “Privreda TK” u Brčkom - Održan 2. sajam „BOSP-EXPO“ u Brčkom
- „Privreda TK“ na sajmu u Bijaču - Održan 17. međunarodni sajam ekologije ‘EKOBIS 2019’
- „Privreda TK“ u Bijeljini - 18. međunarodni poljoprivredni sajam „Interagro“ Bijeljina
- Dženana Hodžić, analitičar u oblasti građevinarstva - “Uprkos nedostatku kadrova, pozitivni trendovi u građevinarstvu“
- Organizator „Imel“ doo Lukavac - U Lukavcu održana konferencija “Tech Cruise”
- Uskoro značajne sajamске manifestacije: Beograd: 57. sajam nameštaja, 5-10. novembra 2019. - Brčko: 18. sajam privrede, 7-9. novembra - Sarajevo: 6. Sajam privrede, 43. Sajam roba široke potrošnje, 10-12.12.2019. - Beograd: 46. sajam građevinarstva “SEEBBE”, 22 – 25.4.2020.



KANTONALNA
PRIVREDNA
KOMORA TUZLA

Dino Kalesić
gl. i odg. urednik

Komorski informator Sadržaj

KANTONALNA PRIVREDNA KOMORA TUZLA

**KOMORSKI INFORMATOR
BROJ 9 i 10/19,**
septembar/oktobar
2019. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Nurudin Žunić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Adnan Imerović, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

| | | |
|--|--|---------|
| | „Neophodna kvalitetnija saradnja sa Službom za zapošljavanje i P/GKFBiH“ | 4 i 5 |
| | 60 godina postojanja Termoelektrane Tuzla | 6 |
| | 45 godina Fabrike cementa Lukavac | 7 |
| | TTU spreman za izgradnju Bloka 7 | 8 |
| | Prijem za članove Uprave JP „Elektroprivreda BiH“ | 8 |
| | Ugovor o koncesiji nužno je pokriti bankovnom garancijom | 9 |
| | Iz GIKIL-a - Sigurniji rad postrojenja! | 10 |
| | “Menpromu” certifikat IFS | 11 |
| | 41. sajam građevinarstva u Budvi | 14 |
| | Održan 2. sajam „BOSP-EXPO“ u Brčkom | 15 |
| | Održan 17. međunarodni sajam ekologije ‘EKOBIS 2019’ | 16 i 17 |
| | 18. međunarodni poljoprivredni sajam „Interagro“ Bijeljina | 18 |
| | Najava sajamskih manifestacija | 24 i 25 |



Iz Udruženja za trgovinu, ugostiteljstvo i turizam...

„Neophodna kvalitetnija saradnja sa Službom za zapošljavanje i P/GKFBiH“

Članovi Odbora Udruženja za trgovinu, ugostiteljstvo i turizam Kantonalne privredne komore Tuzla održali su sjednicu Odbora Udruženja u proširenom sazivu. Na Dnevnom redu sjednice su bile dvije tačke. O JU Služba za zapošljavanje Tuzlanskog kantona i funkciji ove ustanovu u podršci privredi TK govorio je Kasim Selimović predsjednik Odbora Udruženja. Na skupu je Aziz Čačković predsjednik OO sajma "LIST" Lukavac i član Odbora Udruženja predstavio Pravilnik o dodjeli nagrade "Zvijezda turizma", a kao i na brojnim prethodnim sjednicama, razgovaralo se i o problematici, temama, pojavama, sa kojima se privrednici okupljeni u ovo komorsko Udruženje već godinama susreću.



Kasim Selimović predsjednik Odbora Udruženja je iznio niz podataka vezanih za odnos Službe za zapošljavanje TK prema privrednicima i privredi generalno. Istakao je podatak da je na evidenciji Službe za zapošljavanje trenutno više od 75 000 osoba a da, istovremeno, u posljednje dvije godine privrednici imaju veliki i veoma ozbiljan problem zapošljavanja radne snage. **„Mi privrednici, poslodavci sa područja TK, očekujemo da nam Služba bude od pomoći, da posreduje kod zapošljavanja i izbora radne snage. Nažalost, sve više je slučajeva da naši zahtjevi ostaju nerealizovani, ne dobijemo niti jednog radnika zainteresovanog za posao. Ovo je jedan od pokušaja da se to promijeni kvalitetnijom saradnjom Službe i privrednika. Smatramo da je neophodno dobro razmotriti i analizirati stanje, preuzeti određene pozitivne i kvalitetne primjere iz okruženja, povesti se za dobrim primjerima i promijeniti postojeće stanje. Nemoguće je da se jedan kandidat ogлуši na poziv Službe nekoliko puta, neće da prihvati zaposlenje a i dalje se, kao neko ko ne želi prihvatiti posao, vodi na evidenciji iste te Službe. Tražimo da se osobe koje odbiju poziv i ne prihvataju radno mjesto, skidaju sa evidencije Službe i da se na taj način u određenoj mjeri smanje i nameti, jer privreda izdvaja značajna sredstva za finansiranje osoba koje se nalaze na evidenciji Službe. Ujedno, na taj način bi se otvorile mogućnosti zaposlenja onim osobama koje zaista žele posao, koje su se prijavile u Službu kako bi dobili posao i radili, a ne samo bili podatak u evidenciji i ostvarivali određene benefite. Potrebno je, stava smo u Odboru, hitno pristupiti izmjeni Pravilnika po kojem Služba radi, prilagođavanja svih akata koji bi bili od koristi privredi a time i državi. Trebali bi imati kvalitetniju saradnju na obostrano zadovoljstvo. Potrebno je temeljito pripremiti novi kriterije a mi imamo mehanizme, a i na ovom sastanku su ljudi koji nas predstavljaju u Ekonomsko-socijalnom vijeću, Udruženju poslodavaca FBiH, da dođemo do Federalnih nivoa vlasti kako bi dobili podršku na svim nivoima“**, izjavio je predsjednik Selimović.

Kako je istakla Razija Majstorović šefica Odjeljenja za podsticaje u zapošljavanju JU Služba za zapošljavanje TK, kroz programe aktivne politike zapošljavanja podržano je 719 poslodavaca kod kojih su zaposlene 1493 osobe. Podržano je i osnivanje 160 malih preduzeća čime je omogućeno i novo zapošljavanje. Nakon potpisivanja novih ugovora, a nakon što je okončan posljednji Javni poziv krajem septembra, ove brojke će biti znatno veće. kažu u Službi za zapošljavanje TK. **„Nastojalo se i na Federalnom nivou sve napraviti transparentno, svi su akti i dokumenti na web stranici, dostupni, i uvijek poslodavcima preporučujemo da sve detalje Ugovora pažljivo pročitaju. Data je mogućnost i zamjene radnika, dva puta po svakom Ugovoru, i zapošljavanje maksimalno 20 radnika po jednom javnom pozivu“**, izjavila je šefica Majstorović



Na sjednici Odbora Udruženja predstavljen je Pravilnik o dodjeli nagrade "Zvijezda turizma", nagrada dodijeljena po prvi put ove godine u okviru Sajma turizma i ekologije "List" Lukavac a dodjeljuje je Privredna/Gospodarska komora FBiH. **„Nagrada je dodijeljena doo "Panonika" Tuzla**



bez kategorija i posebnih kriterije, bila je dodijeljena za izuzetan doprinos razvoju turizma. Kada je u pitanju nagrada koja će biti dodijeljena u okviru narednog sajma 2020. godine, P/GKFBiH formira poseban tim koji će u periodu od 3 do 6 mjeseci ocjenjivati pristigle kandidature za dodjelu priznanja. **Biće to na veoma visokoj i stručnoj razini i sasvim sigurno je da će kvalitet biti zagarantovan“**, izjavio je Aziz Čačković predsjednik OO sajma "LIST" Lukavac. Kompletan tekst Pravilnika objavljen je na web stranici Komore: www.kpktz.ba.



Privrednici okupljeni u Odbor ovog komorskog Udruženja i na ovom sastanku su istakli određena nezadovoljstva. Prije svega, stava su da se treba više pažnje posvetiti radu sa firmama članicama Komore, zastupati njihove interese kod relevantnih institucija i nivoa vlasti. S tim u vezi, još jednom je istaknuta neophodnost kvalitetnijeg povezivanja sa Privrednom/Gospodarskom komorom FBiH. Stava su da je jaka veza kantonalne sa Privrednom komorom FBiH prilika i mogućnost lakšeg podnošenja inicijativa za promjene određenih propisa, akata, zakona koji se kreiraju na Federalnom nivou a direktno utiču na privrednike u Kantonu. Neophodno je uspostaviti partnerski odnos kako bi se stvorili što povoljniji uslovi za privređivanje, obezbijedio kvalitetniji poslovni ambijent čime bi na dobitku bili i privreda, država u cjelini a time i privredne komore, stava su članovi Odbora Udruženja za trgovinu, ugostiteljstvo i turizam Kantonalne privredne komore Tuzla.

Pripremio: Dino Kalesić

Iz GiKIL-a Lukavac...

Stabilna proizvodnja, predviđanje rasta

Proizvodnja u GIKIL-u bilježi stabilne poslovne rezultate, do kraja godine predviđen rast

Uprkos brojnim poteškoćama sa kojima se kompanija suočava u posljednje dvije godine, proizvodnja u Global Ispat Koksnoj Industriji d.o.o. Lukavac (GIKIL) bilježi stabilne poslovne rezultate. Tokom devet mjeseci 2019. godine iz fabrike Koksara izvezeno je 340.000 tona koksa, dok planirani izvoz već za mjesec oktobar predstavlja povećanje za 25 posto. Ukupan planirani izvoz za 2019. godinu iznosi 500.000 tona, što predstavlja ostvarenje poslovnog plana koji prati prošlogodišnji rezultat.

„Imajući u vidu da je ovo bila jedna od najturbulentnijih godina na tržištu čelika i koksa, uzrokovana trgovinskim ratom između Kine i Amerike, ostvoreni proizvodni rezultat možemo smatrati velikim uspjehom jer smo i pored toga uspjeli da se održimo na nivou prošle godine koja je za GIKIL bila rekordna“, kazao je zamjenik direktora za prodaju koksa Elvir Mukić. Sličan trend proizvodnje zadržan je i u ostalim fabrikama. Nakon višemjesečnog zastoja u radu, te nakon što su ispunjeni osnovni preduslovi vezani za zaštitu okoliša, najmlađa fabrika u GIKIL-u, fabrika anhidrida maleinske kiseline (AMK) iz mjeseca u mjesec bilježi konstantan proizvodni rast.



„Zahvaljujući visokoj kvaliteti proizvoda, slično kao i prošle godine, GIKIL-ov AMK je svoje mjesto našao među

kupcima u čak 15 zemalja regije i svijeta, uključujući Francusku, Njemačku, Italiju, Poljsku, Češku, Slovačku, Tursku, Belgiju, Grčku i Švicarsku“, istakao je zamjenik direktora za prodaju KAN-a i AMK Ermin Čeliković. Uprkos jakoj konkurenciji na tržištu, nakon ponovnog pokretanja proizvodnje, i fabrika Azotara uspjela je održati svoj status na tržištu BiH i biti broj jedan sa svojim proizvodom KAN-om među domaćim potrošačima kada je u pitanju korištenje đubriva. **„Sve ovo je još jednom potvrdilo da poljoprivrednici prepoznaju kvalitet našeg proizvoda, da imaju pozitivna iskustva i što je najvažnije odlične prinose“**, dodao je Čeliković. Pored bosanskohercegovačkog tržišta, te tradicionalno Hrvatske i Srbije, KAN je svoje mjesto i ove godine našao među kupcima u Austriji, Makedoniji, Mađarskoj, Italiji, Crnoj Gori i Sloveniji. Prema riječima zamjenika generalnog direktora Suada Imamovića, do kraja godine plan je nastaviti sa rastom proizvodnje u svim proizvodnim fabrikama GIKIL-a zadržavajući time i status najvećeg izvoznika na Tuzlanskom kantonu, te jednog od najvećih izvoznika u BiH na čijoj listi GIKIL trenutno zauzima treće mjesto. Stabilna proizvodnja, planirani rast i razvoj, kao i nastavak značajnog investiranja u zaštitu okoliša omogućit će i zaštitu radnih mjesta, ne samo hiljadu direktno uposlenih, nego i nova zapošljavanja, ali i širenje poslovne mreže doprinoseći i na taj način razvoju Tuzlanskog kantona i Federacije, te cjelokupne ekonomije u zemlji. **„Dugogodišnje povjerenje koje je GIKIL izgradio sa svojim mnogobrojnim kupcima i dobavljačima, njih čak 460, pruža pouzdan oslonac i za sklapanje novih stabilnih poslovnih ugovora, ali i redovno izmirenje obaveza kako prema našim saradnicima, tako i prema državi i našim radnicima čija su primanja u odnosu na federalni prosjek još uvijek veća za oko 20 posto“**, kazao je Imamović. Prema podacima iz 2018. godine, u ukupnom bruto domaćem proizvodu GIKIL doprinosi sa 1,1 posto, te sa 2,8 odsto u ukupnom godišnjem izvozu iz BiH.

Global Ispat Koksna Industrija d.o.o. Lukavac



60 godina postojanja Termoelektrane Tuzla...

„Ponos ne samo Tuzle već i cijele države“

Predstavljeni projekti za budućnost - Dodijeljena priznanja bivšim direktorima



Jubilej, 60 godišnjica Termoelektrane „Tuzla“, obilježen je podsjećanjem na dug razvojni put Termoelektrane. Ovom prilikom predstavljeni su projekti koji su budućnost najvećeg proizvođača električne energije u BiH, uručena priznanja zaslužnim pojedincima i odata počast polaganjem cvijeća na spomenik radnicima poginulim u odbrambeno – oslobodilačkom ratu. Obilježavanje ovoga značajnog jubileja vezuje se za 24. septembar 1959. godine, kada je Narodni odbor Sreza Tuzla donio Rješenje o osnivanju Termoelektrane u izgradnji Lukavac sa sjedištem u Tuzli.

Denijal Tulumović, premijer Tuzlanskog kantona naglasio je važnost TE „Tuzla“ za Tuzlanski kanton i iskazao podršku razvojnim projektima JP Elektroprivreda BiH koji su budućnost BiH.

„Ispunjavajući svoju zadaću Termoelektrana godišnje proizvodi oko polovine ukupne proizvodnje Elektroprivrede BiH, i to je podatak koji govori o značaju i neophodnosti rada Termoelektrane u Tuzli. Električna energija koja se proizvodi u Termoelektrani Tuzla osigurava elektroenergetsku neovisnost Bosne i Hercegovine, te bi svako dovođenje u pitanje zamjenskog termobloka, značilo i otvaranje pitanja ovisnosti o uvozu električne energije. Strateški gledano, ali i u uslovima vanjskotrgovinskog deficita, smatram da je to opcija o kojoj ne smijemo razmišljati“, zaključio je premijer Tulumović.



Izet Džananović, direktor Termoelektrane Tuzla je podsjetio da se proces proizvodnje odvijao kontinuirano i bez prekida od osnivanja. „Energetska neovisnost, zasnovana na efikasnim i ekološki prihvatljivim procesima proizvodnje energije, može se porediti sa državnim i teritorijalnim suverenitetom te je neophodno realizovati projekte kao što su izgradnja Bloka 7 i revitalizacija Bloka 6 sa izgradnjom postrojenja za odsumporavanje dimnih plinova. Zato nam je potrebna odlučnost i snaga naših prethodnika da realizujemo projekte koje će koristiti buduće generacije i koji će stvoriti pretpostavke za kvalitetan život na ovom prostoru“, istakao je direktor Džananović.

Govoreći o dugom putu razvoju TE „Tuzla“, Bajazit Jašarević generalni direktor JP Elektroprivreda BiH i direktor TE „Tuzla“ u dva mandata, istakao je poštovanost svih uposlenika TE „Tuzla“ u realizaciji razvojnih ciljeva, zahvaljujući čemu je Termoelektrana sa svojih 60 godina rada ponos ne samo Tuzle već i cijele države. U povodu obilježavanja svečanosti 60 godina TE „Tuzla“ priznanja su dodijeljena bivšim direktorima Nihadu Mazaloviću, Bajazitu Jašareviću, Mirzi Džindo, Jusufu Meriću i Fadilu Nadareviću. Za zasluge u razvoju TE „Tuzla“ priznanja su uručena i Teufiku Đapi, Pašagi Jahiću i Ahmetu Aliefendiću penzionerima kroz čije životne priče je prikazan rast i razvoj TE „Tuzla“. Od izgradnje do danas, TE „Tuzla“ je najveći proizvođač električne energije u BiH. Sa instaliranom snagom 723 MW, prosječnom godišnjom proizvodnjom oko 3.600 GWh električne energije i potrošnjom oko 3,3 miliona tona uglja, jedan je od ključnih proizvodnih objekata u sastavu JP Elektroprivreda BiH d.d. – Sarajevo. Pored električne energije, TE „Tuzla“ proizvodi i isporučuje toplotnu energiju za sisteme daljinskog grijanja Tuzle i Lukavca i opskrbljuje više od 20.000 potrošača, a za potrebe industrije obezbjeđuje tehnološku paru. Preko pogona TE „Tuzla“ obezbjeđeno je i kvalitetno vodosnabdijevanje za Grad Tuzla. Osim premijera Tulumovića, u ime Vlade Tuzlanskog kantona svečanosti su prisustvovali i ministri privrede i prostornog uređenja i zaštite okolice Asmir Hasić i Elvir Rožnjaković.


D.K.



FCL: obilježavanje velikog jubileja...

45 godina Fabrike cementa Lukavac

Veliki doprinos daljem razvoju i unapređenju svoje lokalne zajednice - Pokrenut projekt VISIT US



Svečanim otvaranjem novog, rekonstruisanog platoa ispred Doma kulture Lukavac, u koji je Fabrika cementa Lukavac uložila preko 120.000 KM je obilježeno i njenih 45 godina rada. Ovom donacijom Lukavac Cement je dao veliki doprinos daljem razvoju i unapređenju svoje lokalne zajednice.

Zajedno sa brojnim građanima, uposlenicima i gostima uz prigodan program otvoreni je novouređeni plato površine 2.000 m², te proslavljen dugogodišnji uspješan rad ove kompanije. 45 učenika OŠ „Lukavac Grad“ za 45. rođendan Fabrike cementa Lukavac presjeklo je svečanu vrpcu, dok su pozitivnu atmosferu upotpunili dječiji orkestar, ritmička sekcija OŠ „Lukavac Grad“, kao i dječija plesna grupa „Čarolija“. Predstavnici Općine Lukavac, JU „Centar za kulturu“ Lukavac i Fabrike su tokom otvaranja istakli da je grad Lukavac dobio moderno gradsko središte uređeno prema najvišim standardima, prikladno za razne vrste okupljanja i druženja.

Voditeljica razvoja proizvoda Fabrike cementa Lukavac Nataša Crvenković je tom prilikom naglasila da je ulaganje od preko 120.000 KM u rekonstrukciju platoa samo jedan od infrastrukturnih projekata koji su podržali, te da će se i ubuduće kao društveno odgovorna kompanija zalagati da grad Lukavac i njegovi građani imaju što

ugodniju i zdraviju okolinu.

„Izuzetno smo ponosni na rezultate ovog projekta i raduje me da su građani Lukavca zadovoljni. Smatram da je odluka da skupa slavimo i naših 45 godina rada od velike važnosti za sve nas. Samo svečano otvaranje i obilježavanje našeg 45. rođendana prepustili smo mladim naraštajima, čije aktivnosti rado podržavamo raznim projektima. U našoj već dugoj historiji postali smo prepoznatljiv privredni subjekt u Lukavcu i BiH, koji svojim djelovanjem misli prije svega na ljude i okoliš. Investirajući posljednjih godina velika sredstva u najmodernije tehnologije, upotrebu alternativnih goriva i zaštitu životne sredine svrstali smo se među najmodernije fabrike Evrope. Usmjereni smo isključivo na dalju zajedničku gradnju bolje i zdravije budućnosti za grad Lukavac i BiH“, kazala je Crvenković.

U povodu obilježavanja svog 45. rođendana Lukavac Cement pokrenuo je i projekt VISIT US, kojim se građani, kompanije, škole i fakulteti iz BiH pozivaju da posjete fabriku, upoznaju se sa njenim savremenim tehnologijama, te saznaju više o upotrebi i značaju alternativnih goriva. Najava posjeta putem aplikacije VISIT US na web stranici www.lukavaccement.ba.

FCL: 11. „Dan otvorenih vrata“

U prijateljstvu s prirodom



U septembru, mjesecu obilježavanja velikog jubileja, u krugu Fabrike cementa Lukavac održani su 11. po redu „Dan otvorenih vrata 2019“. Kao i svih dosadašnjih godina organizovano je veselo i ugodno porodično druženje. Lukavac Cement svakodnevno unapređuje saradnju sa građanima, vladinim i nevladinim organizacijama, ekološkim udruženjima, školama, obdaništima i svima onima koji imaju isti cilj, očuvanje prirode i njenih resursa. Živjeti u skladu i prijateljstvu s prirodom je jedna od osnovnih odrednica Fabrike cementa Lukavac.

Pozvani su da na ovaj događaj, sve građanke i građani, poslovni partneri i prijatelji, posjete Fabriku cementa Lukavac. dočekalo ih je mnogo dobre zabave, sportskih aktivnosti, radionica, kao i korisne informacije o razvrstavanju i recikliranju otpada koje su prezerirali vrijedni učenici OŠ „Lukavac Grad“. Najmlađi su mogli uživati u predstavi, mađionarskim čarolijama, igrali se na zelenim površinama fabrike i naučili kako napraviti zanimljive predmete od cementa i betona.

D.K.



Iz Vlade Tuzlanskog kantona...

TTU spreman za izgradnju Bloka 7



Tvornica transportnih uređaja u Tuzli (TTU) spremno dočekuje izgradnju Bloka 7 Termoelektrane Tuzla. Zaključeno je ovo nakon posjete delegacija Vlade FBiH i Vlade TK tuzlanskom TTU. Obzirom da su se stekli svi preduslovi za početak izgradnje Bloka 7 Premijeri Fadil Novalić i Denijal Tulumović sa ministrima Nerminom Džindićem i Sulejmanom Brkićem posjetili su TTU i u društvu direktora kompanije Almira Zulića obišli proizvodne pogone ove fabrike. Delegacije su se uvjerile u spremnost tuzlanske fabrike da se već od početka izgradnje Bloka 7 uključi u ovaj proces i svojim kapacitetima pomogne realizaciju ovog velikog elektro – energetskeg projekta. „Zadovoljni smo ovim što danas vidimo u TTU-u. Kompanija danas izgleda vrlo respektabilno i spremna je odgovoriti svim zadacima koji se pred nju budu postavljali“, rekao je premijer Novalić ističući značajan pozitivan iskorak koji je TTU napravio u protekle dvije godine. Pozitivnim ocjenama pridružili su se i premijer Tuzlanskog kantona Denijal Tulumović i ministar unutrašnjih poslova Sulejman Brkić. „Zadovoljstvo je vidjeti oko 200 vrijednih ljudi koji rade i ovdje stvaraju novu vrijednost. Približava nam se izgradnja Bloka 7 i drago nam je vidjeti da je TTU u protekle dvije godine dovoljno stabilan da odgovori i najkompleksnijim zadacima koji se pred njega budu stavljali u realizaciji ovog projekta“, zaključio je premijer Tulumović.

Prijem za članove Uprave JP „Elektroprivreda BiH“



Premijer Tuzlanskog kantona Denijal Tulumović primio je u radnu posjetu članove Uprave JP Elektroprivrede BiH d.d Sarajevo v.d izvršnog direktora za proizvodnju Senada Sarajlića i izvršnog direktora za distribuciju Admira Andeliju. Razgovaralo se o aktuelnoj situaciji u energetskeg sektoru na području Tuzlanskog kantona sa posebnim osvrtom na rudnike u sastavu Koncerna, RMU Đurđevik i Rudnik Kreka. Premijer Tulumović je naglasio značaj energetskeg sektora na području Kantona i Vlada TK je zainteresirana za dalji razvoj ovog sektora, te da će biti partner Vladi FBiH i JP Elektroprivredi BiH u narednim aktivnostima. „Vlada TK daje punu podršku nastavku aktivnosti na izgradnji Bloka 7 u TE Tuzla, Bloka 1 nove TE Banovići, daljem reorganizacije

rudnika, rješavanju problema odlagališta Čajinci za PK Dubrave, nastavka investiranja u rudnike, nastavka projekta toplifikacije općina i gradova na području TK, te plaćanju obaveza koje rudnici sa područja TK imaju prema fondovima i koncesijama“, izjavio je premijer Tulumović i dodao da Vlada TK insistira da se na narednim velikim projektima u energetskeg sektoru maksimalno angažuju domaće firme u skladu sa važećim zakonima. Direktor Sarajlić je istakao da je stanje u rudnicima uglja u Koncernu teško, i da se u narednom periodu mora više učiniti na njihovom ozdravljenju. „Projekti reorganizacije po nalogu Vlade FBiH su započeti i JP Elektroprivreda BiH vodi aktivnosti. Međutim bez učešća svih aktera, Vlade FBiH, Vlade TK, uprava rudnika i sindikata, upitan uspjeh aktivnosti“, rekao je Sarajlić i istaknuo da je da Program restrukturiranja energetskeg sektora u FBiH je obaveza proistekla iz Ugovora o energetskeg zajednici JI Evrope kojeg je naša država potpisnica. Međutim, ovaj program ne predviđa da RMU Banovići uđu u sastav Koncerna i da JP Elektroprivreda BiH nije zainteresirana za to, ali da je JP Elektroprivreda BiH izuzetno zainteresirana za dalji razvoj RMU Banovići jer je taj rudnik veoma bitan za energetskeg sistem FBiH. Sarajlić također ističe da su investicije u energetskeg sektor investiranje u budućnost i zamajac razvoja metalske i elektroindustrije u FBiH i TK. Članovi Uprave JP Elektroprivreda BiH su izrazili zahvalnost Vladi TK i Premijeru Tulumoviću na iskazanoj podršci za planove JP Elektroprivreda BiH.

D.K.



Iz rudnika “Kreka”...

Ugovor o koncesiji nužno je pokriti bankovnom garancijom

Rudnici Kreka trenutno ne mogu obezbijediti bankovnu garanciju i traže od Vlade i Skupštine TK da izmijeni zakon



Rješenje problema nemogućnosti dobijanja koncesije za iskopavanje uglja za Rudnike Kreka nije u prebacivanju tereta na Vladu Tuzlanskog kantona, Ministarstvo privrede i Skupštinu TK nego u obezbjeđenju bankovne garancije da bi se dobio ugovor o koncesijama. Situaciju u kojoj su se našli Rudnici Kreka detaljno je objasnio, na ovom povodom sazvanoj press-konferenciji, ministar privrede Tuzlanskog kantona Asmir Hasić.

„Zakon o koncesijama je jasno definisao šta neko mora posjedovati da bi dobio ugovor o koncesijama a to je bankovna garancija. Rudnici Kreka trenutno ne mogu obezbijediti bankovnu garanciju i traže od Vlade i Skupštine TK da izmijeni zakon. Na taj način, onaj ko je doveo Kreku u ovu situaciju želi da prebaci teret na Vladu TK, na Ministarstvo i Skupštinu. Poseban akcenat stavljam da se obračam rudarima Rudnika Kreka da Vlada TK, Ministarstvo privrede i Skupština TK nisu nikakav problem kada je u pitanju ugovor o koncesiji Rudnika Kreka nego ko je kriv za to neka kaže na koji je način doveo Rudnike Kreka da

nijedna banka ne želi da saraduje kada su u pitanju bankovne garancije kojima je potrebno obezbijediti ovaj ugovor o koncesijama.“ Ukupna potraživanja Tuzlanskog kantona od Rudnika Kreka, rečeno je ovom prilikom, iznose 16,6 miliona KM a tome treba još dodati i velika dugovanja za penziona i zdravstvena osiguranja. Ministar Hasić kazao je da Rudnici Kreka od januara eksploatišu uglj bez ugovora o koncesijama a Uprava Rudnika je u međuvremenu pokrenula inicijativu da se izmijeni Zakon o koncesijama, da se u zakonu izuzme bankovna garancija a ugovor obezbijedi mjenicom. Budući da su Rudnici Kreka posluju u okviru koncerna Elektroprivrede BiH, istaknuo je ministar Hasić, potrebno je da se u rješavanje ovog problema uključi i EPBiH kao i resorno Federalno ministarstvo i omoguće bankovnu garanciju za Rudnike Kreka. **„Smatram da je nekorektno ponašanje da jedne privilegujemo a da se sa drugima ponašamo u skladu sa zakonom. Kada su u pitanju privatne firme, kamenolomi i pjeskare, niko od njih nema nijedan fening prema Ministarstvu kada su u pitanju koncesije. Svi izmiruju svoje obaveze i svi svoje ugovore o koncesiji pokrivaju bankovnom garancijom“**, naglasio je ministar Hasić.

Iz Solane dd Tuzla...

Dan solara i 134 godine rada Solane Tuzla

Prigodnim aktivnostima obilježen jubilej



U povodu Dana solara i obilježavanja 134 godine rada Solane Tuzla, upriličen je prijem porodica poginulih boraca, položeno je cvijeće i odata počast na spomen obilježje u krugu ovog preduzeća. Organizovan je i svečani prijem kojem su prisustvovali predstavnici društvene zajednice, te mnogobrojni prijatelji Solane. **“Koristimo ovu priliku da se zahvalimo svim lojanim potrošačima naših proizvoda za sve godine nesebične podrške, te se nadamo da će i u budućem vremenskom periodu njihovo ispravno opredjeljenje biti naš, domaći i najbolji proizvod”**, istakli su iz Solane. Povodom obilježavanja 134 godina Solane, već tradicionalno, direktor Bakir Smalagić je upriličio prijem porodicama poginulih boraca Solane. Osim članova Uprave Solane, svečanosti su prisustvovali i predstavnici Sindikata, JOB-a, Aktiv žena, te ostali uposlenici Solane d.d. Tuzla. Uz riječi dobrodošlice uručeni su im poklon paketi, prikladna finansijska pomoć, te ogrijev za jednu grejnu sezonu. Po završetku svečanog prijema svi prisutni su zajedno položili cvijeće na spomen ploču poginulim borcima Solane d.d. Tuzla.

D.K.



Iz GIKIL-a...

Sigurniji rad postrojenja!

Modernizacijom pogona na fabrici Koksara do sigurnije proizvodnje i zdravijeg okruženja



Na pogonu fabrike Koksara instalirana je nova centrifuga za izdvajanje soli amonsulfata čime je postignut sigurniji rad postrojenja. Prema riječima menadžerice za okoliš Emre Halilović ovime je završena prva faza još jednog vrijednog projekta koji će pored tehnološko-sigurnosnih vrlo brzo polučiti i značajne rezultate s ciljem zaštite okoliša.

„Puštanje u rad nove centrifuge urađeno je od strane renomirane firme iz Njemačke, koji su potom izvršili i obuku našeg osoblja. Ovime je okončan

značajan dio poslova na ovom pogonu, ujedno je završena i sanacija skladišta amonsulfata, a već je započeta i rekonstrukcija saturatora i prateće opreme, tako da ćemo narednih mjeseci moći reći da smo zaokružili jedan od većih projekata u GIKIL-u na kojima smo vrijedno radili u proteklom periodu“, istakla je Halilović.

Pored modernizacije pogona amonsulfata u planu je i optimizacija kompletnog postrojenja biološkog prečišćavanja otpadnih voda iz fabrike Koksara, što predstavlja i jednu od obaveza iz vodne dozvole koja je GIKIL-u izdata u februaru.

„U toku je evaluacija ponuda i izbor izvođača radova i za ovaj veoma vrijedan projekat čijim završetkom će svi izlazni parametri potpuno zadovoljiti zakonski propisane norme i granične vrijednosti biohemijskog sastava otpadnih voda“, pojasnila je te dodala da se u skorijem periodu očekuje i zvanična posjeta Komisije za ocjenu zahtjeva za izdavanje okolinske dozvole, formirane od Federalnog ministarstva okoliša i turizma, koja će također biti u prilici da se tokom obilaska uvjeri u sve poduzete aktivnosti i radove na terenu, te pozitivne pomake koje je GIKIL napravio u posljednjih godinu dana.

Podsjećamo, od ukupno 47 projekata za siguran i okolinski prihvatljiv rad GIKIL-a koje je Uprava kompanije pokrenula u augustu prošle godine, završena su čak 43, a u toku su radovi i na preostala četiri projekta.

Nova predsjednica NO, novi gen. direktor

Shristi Mittal predsjednica Nadzornog odbora, izabran i novi generalni direktor



sastav Nadzornog odbora imenovao je i novog generalnog direktora kompanije, tako da će ovu funkciju u narednom periodu obavljati Vibhuti Verma, inženjer proizvodnje sa više od 27 godina radnog iskustva u upravljanju lancima snabdijevanja, prodaji i planiranju, upravljanju nabavom i marketingom, uključujući uvoz i izvoz, kao i proizvodnju. Nadzorni odbor na čelu sa predsjednicom Shristi Mittal i članovima Ivan Vukšić, Edin Hodžić, Ivana Bunoza i Mate Pavković, te Uprava društva ostaju opredijeljeni za zajedničku borbu za očuvanje radnih mjesta i redovne isplate plata i ostalih naknada radnicima, kao i za unapređenje proizvodnje, te nastavak poboljšanja u oblasti zaštite okoliša i sigurnosti okruženja, kako za radnike tako i za širu društvenu zajednicu. Na tom putu, rukovodstvo GIKIL-a očekuje pomoć i partnerstvo sa svim nivoima vlasti, uključujući i sindikat te lokalnu zajednicu, poručeno je sa konstituirajuće sjednice.

Global Ispat Koksna Industrija d.o.o. Lukavac

Nakon što je održana Skupština društva Global Ispat Koksna Industrije d.o.o. Lukavac (GIKIL) na kojoj su izabrani novi članovi Nadzornog odbora, (8.10.2019.godine) održana je i konstituirajuća sjednica ovog tijela. Za predsjednicu Nadzornog odbora GIKIL-a jednoglasno je izabrana Shristi Mittal, a novi



Menprom ispunio visoke zahtjeve...

“Menpromu” certifikat IFS

Prva mesna industrija u BiH koja je dobila međunarodni certifikat IFS



Menprom je od prvog proizvedenog proizvoda do danas plasirao široku paletu kvalitetnih, ukusnih proizvoda proizvedenih posebnom pažnjom i po jedinstvenim recepturama. Vrhunski mesni delikatesi proizvedeni od visokokvalitetnog pilećeg, govedećeg i purećeg mesa godinama unazad čine Menprom jednom od vodećih mesnih industrija u našoj zemlji. Kombinacija prirodnih tradicionalnih ukusa i potvrđenog vrhunskog kvaliteta sa neprestanim ulaganjem u nova znanja i tehnologije, vrijednost je koju su potvrdile brojne medalje i plakete za kvalitet proizvoda, a od juna ove godine i IFS (International Food Standard) certifikat čime je obezbjeđen i jedinstven međunarodni pristup za ocjenjivanje dobavljača u odnosu na sistem kvaliteta i sigurnost hrane. Međunarodnim IFS certifikatom potvrđeno je i osigurano provođenje svih zahtjeva za sigurnost i kvalitet hrane duž cijelog lanca proizvodnje. Standard je priznat i odobren od strane velikih evropskih i svjetskih trgovačkih lanaca kao što su: Wal-mart, Metro, Lidl, Aldi, COOP, Migro, Carrefour, Auchan, Rewe i drugih, te sada predstavlja standard za bezbjednost hrane koji je najviše zastupljen u Evropi. Implementacijom IFS standarda, Menprom je morao ispuniti visoke zahtjeve koje ovaj standard zahtjeva i na taj način je dobijena dodatna sigurnost u proizvodnji mesnih proizvoda, što je još jednom potvrdilo opredjeljenost ove kompanije da proizvodi domaći proizvod vrhunske kvalitete. Dobijanjem IFS certifikata Mesna industrija Menprom potvrdila je svoju misiju da svojim kupcima i potrošačima isporučuje sigurnu hranu dobre kvalitete kako na domaćem tržištu tako i na izvoznim tržištima Srbije, Makedonije i Crne Gore. Zahvaljujući IFS standardima Menpromovi proizvodi mogu se plasirati na tržišta svih najznačajnijih evropskih trgovačkih lanaca. Uvođenjem ovog standarda Menprom se obavezao da će nastaviti rad na zadržavanju postojećeg kvaliteta svojih proizvoda ali i da će raditi na podizanju sigurnosti cjelokupnog proizvodnog lanca, što će krajnjem potrošaču garantovati da će kupovinom i konzumacijom Menpromovih proizvoda zapravo jesti sigurne, kvalitetne i zdrave namirnice, meso i mesne prerađevine. Podsjećamo, kompanija Menprom od ranije posjeduje međunarodni standard ISO 22 000-2005 iz 2007. godine sa HACCP principima, HALAL certifikat iz 2008. godine kao i brojne druge certifikate i priznanja za kvalitet.

► Više o IFS standardu



Vodeći međunarodni trgovački lanci i dobavljači prepoznali su sigurnost hrane kao prioritet u svome poslovanju te su u maju 2000. godine pokrenuli Globalnu inicijativu za sigurnost hrane (Global Food Safety Initiative – GFSI), koju provodi udruženje trgovaca CIES (Food Business Forum). International Food Standard (IFS) jedan je od rezultata takvih udruživanja. Razvili su ga njemački maloprodajni lanci kako bi dobili osnovu za provjeru privatnih robnih marki, a prihvatila ga je Nacionalno udruženje njemačkih trgovaca 2002. godine. Cilj je bio razviti međunarodnu sigurnosnu normu za kompanije koje se bave proizvodnjom privatnih robnih marki za trgovačke lance, sa jednoobraznim formulama, postupcima provjere i uzajamnim prihvaćanjem tih provjera. IFS norma osigurava visok nivo transparentnosti širom lanca isporuke robe odnosno prometa

hrane. Ova usluga namijenjena je trgovcima, proizvođačima hrane i kompanijama koje se bave auditom normi. GFSI odgovoran je za inspekciju i ovlašćivanje ovog standarda, a proces provjere testirala je nezavisna stručna komisija. Rezultat zajedničkih težnji je međunarodno priznanje standarda u avgustu 2007. godine pod imenom International Food Standard – IFS. Standard je priznat i odobren od strane velikih evropskih i svjetskih trgovačkih lanaca kao što su: Wal-mart, Metro, Lidl, Aldi, COOP, Migro, Carrefour, Auchan, Rewe i drugih, te sada predstavlja standard za bezbjednost hrane koji je najviše zastupljen u Evropi. IFS predstavlja objedinjen standard kvalitete i standard za bezbjednost hrane, razvijen kako bi provjerio kompetentnost proizvođača hrane u pogledu bezbjednosti ali i kvalitete hrane uz pomoć jednog standarda, čime se štedi i vrijeme i novac. Standard se može primjeniti na dobavljače u svim koracima prerade hrane.

D.K.



Konferencija i sajam...

“Zelena ekonomija u BiH – mogućnosti i šanse”

Ukoliko želite preživjeti na globalnom ekonomskom tržištu:
Zelena ekonomija nije stvar izbora, već imperativ



Heinrich Boell Stiftung u Bosni i Hercegovini godinama unazad se zalaže za razvoj zelene ekonomije u našoj državi, što samim time znači i zdravijeg životnog okruženja za građane i građanke. Jedan od načina na koji se to može postići upravo je i konferencija i sajam “Zelena ekonomija u BiH – mogućnosti i šanse”, koji je ove godine održa i u Tuzli. Mladi poduzetnici, ali i oni nešto stariji su se kao i prethodne dvije godina imali priliku predstaviti s inovativnim idejama, te pokazati da se rad u poljoprivredi, ekoturizmu, na recikliranju i upravljanju otpadom, kao i bavljenje solarnom i drugim obnovljivim vidovima energije zaista financijski isplati, te da pruža neovisnost i ujedno doprinosi generalnom zdravlju štiteći okoliš. Koordinatorica Konferencije i Sajma iz Heinrich Boll Stiftung Jasminka Bjelavac kaže da se ovim događajem željelo pokazati kako zaštita okoliša ne mora biti samo trošak, već da može biti i osnova za održivi razvoj zelene ekonomije. Temelj je shvatiti da o okolišu trebaju misliti svi i da to ne koči razvoj.

„Zelena ekonomija može dobro da posluži za upošljavanje teško zapošljivih grupa kao što su osobe s invaliditetom, žene, pogotovo one iz ruralnih područja. Zelena ekonomija se prije svega fokusira na unapređenje ljudske dobrobiti i socijalnu jednakost kao elemente održivog razvoja“, istakla je Jasminka Bjelavac.

Navodi da su Sajam i Konferencija prilika da ljudi razmijene iskustva, da inspiriraju druge ljude kako bi krenuli istim pravcem.

„U Tuzli smo imali predstavnike lokalne zajednice, od gradonačelnika, pa do direktora nekih komunalnih preduzeća, koji ulažu napore za zelenu ekonomiju, a koji trebaju da osiguraju ambijent u kojem će se zelena

ekonomija razvijati. Također, imali smo predstavnike akademske i stručne javnosti, kao i praktičare zelene ekonomije. Želimo da kažemo da zelena ekonomija nije stvar izbora, već je to imperativ ukoliko želite preživjeti na ovom globalnom ekonomskom tržištu“ navela je Bjelavac.



Istakla je kako je na Konferenciji predstavljeno iskustvo iz Ljubljane, koja je prije tri godine proglašena za zelenu prijestolnicu Europe.

„Ljubljana je lider u mnogo čemu, imali smo iskustvo vezano za održivu mobilnost, prezentaciju za savremena rješenja upravljanja prije svega komunalnim otpadom također“, kazala je.

Prvi panel Konferencije odnosio se na generalnu ulogu lokalnih zajednica, šta trebaju činiti, koje političke odluke se trebaju donijeti, odrediti da li je to nešto što bi trebalo biti budućnost BiH i što je potrebno kako bi se to postiglo. Na drugom panelu sudionici su pričali o upravljanju komunalnim otpadom, dok je treći panel bio posvećen ruralnom razvoj, organskoj poljoprivredi i ekoturizmu.

Konferenciju i sajam organizovala je Fondacija Heinrich Boell Stiftung uz pomoć Grad Tuzla, te Centra za ekologiju i energiju iz Tuzle. Direktorica Centra za ekologiju i energiju Džemila Agić bila je i na prošlogodišnjem Zelenom sajmu.



„Kada sam prvi put otišla na Sajam, čula sam neke stvari i inicijative za koje nisam znala da postoje, iako se smatram informisanom i nekim ko prati te alternativne pokrete i ideje, tako da smatram da je to odlična prilika za nove ideje i neke zelene pokrete. Ono što je posebno interesantno jeste da se ljudi okupe na jednom mjestu i da dobiju prostor, čak i oni koji nemaju sredstava da plate štand i da prezentuju građanima svoje usluge“, istakla je.

Kada je u pitanju Bosna i Hercegovina, kaže da je posmatra kao zemlju velikih potencijala, koja ima velike šanse za razvoj zelene ekonomije i zelenih radnih mjesta.

„Jasno je da BiH ima resurse i ljude koji mogu da razvijaju zelenu ekonomiju i da proizvode i stvaraju zelena radna mjesta, imamo robne i šumske resurse i prelijepu prirodu, ali ekološke probleme te istovremeno možemo koristiti robne resurse i rješavati ekološke probleme. Tuzla ima i ekonomske i zelene potencijale, ali i ekološke probleme, recimo razvijanjem zelene ekonomije i radnih mjesta, možemo dugoročno gledajući rješavati ključni problem, a to su zagađenja“, poručila je.



Sajam je bio organiziran na Trgu Slobode, a Konferencija u prostorijama Kantonalne privredne komore Tuzla. Izlagača i izlagačica bilo je iz područja organske poljoprivrede i prerade hrane, ali također i onih koji se bave solarnom i drugim obnovljivim vidovima energije, energetskom efikasnošću, recikliranjem i upravljanjem otpadom, ruralnim i ekoturizmom. Brojni predstavnici institucija, međunarodnih i domaćih organizacija, eksperti i praktičari zelene ekonomije s ciljem pokretanja diskusije, razmjene znanja i iskustava u oblasti razvoja i unapređenja zelene ekonomije i “zelenih poslova” u Bosni i Hercegovini prisustvovali su ovom događaju. Prethodne dvije godine konferencija i sajam “Zelena ekonomija u BiH – mogućnosti i šanse” održani su u Visokom i Konjicu, a posjetioci su imali priliku saznati više o tome šta podrazumijeva zelena ekonomija, te koliko je ona važna u kontekstu Bosne i Hercegovine.

Komora Tuzla domaćin info sesije...

Prezentacija javnog poziva “Farma II” projekta

Dodjela bespovratnih sredstava kojima se podstiču ulaganja u inovacije u poljoprivredi, jačanje uloge žena, mladih i marginaliziranih grupa te novoosnovanih preduzeća, kao i promocija poljoprivrednih proizvoda s ciljem povećanja prodaje i osiguranja pristupa tržištima



Kantonalna privredna komora Tuzla je bila domaćin info sesije o novom javnom pozivu za podršku razvoju poljoprivrede u Bosni i Hercegovini koji u okviru projekta FARMA II implementiraju USAID i Vlada Švedske. Javni poziv se odnosi na dodjelu bespovratnih sredstava kojima se podstiču ulaganja u inovacije u poljoprivredi, jačanje uloge žena, mladih i marginaliziranih grupa te novoosnovanih preduzeća, kao i promocija poljoprivrednih proizvoda s ciljem povećanja prodaje i osiguranja pristupa tržištima. Ukupno raspoloživi grant fond za ovaj poziv je 1,2 miliona USD. Pravo apliciranja imaju registrovani obrti i pravna lica a pojedinačni grantovi idu od 5.000 – 50.000 USD, u zavisnosti od vrste projekta i aplikanta, a od aplikanta se očekuje vlastito učešće od 50% vrijednosti projekta. Prisutni su dobili informacije o oblastima i proizvodnjama koje su podržane ovim projektom, prihvatljivim aktivnostima, načinu finansiranja kao i procesu i rokovima apliciranja. S obzirom da su poljoprivreda i proizvodnja hrane značajni potencijali našeg kantona, Komora kontinuirano radi na edukaciji poljoprivrednih proizvođača kao i informisanju i promotivnim aktivnostima, a u cilju jačanja ovog sektora. Sve dodatne informacije o projektu moguće je dobiti na web stranici projekta www.farmabih.ba.

D.K.



„Privreda TK“ u Budvi...

41. sajam građevinarstva u Budvi

Nastavljena saradnja Komore i Jadranskog sajma – 41 godina sajma građevinarstva – 51 godina Jadranskog sajma



Nastavljena je kvalitetna i za firme članice Komore, izuzetno korisna saradnja Kantonalne privredne komore Tuzla i „Jadranskog sajma“. Upravo zahvaljujući susretljivosti menadžmenta „Jadranskog sajma“ Budva, i ove godine se uspješno obezbijediti prostor za izlaganje na 41. sajmu građevinarstva koji je u Budvi održan od 25. do 29. septembra. „Mi ne krijemo zadovoljstvo ostvarenom saradnjom i možemo istaći kako smo ponosni na činjenicu da smo brojnim sajmovima na kojima obezbjeđujemo prostor za naše članice, dodali i ovaj izuzetno kvalitetan i na najvišem nivou organizovan sajam u Budvi. Zadovoljstvo ne kriju niti predstavnici naših firmi, članica Komore, koji se kroz razne vidove, u skladu sa svojim mogućnostima, pojavljuju na ovoj značajnoj sajamskoj manifestaciji, prezentuju svoje usluge i proizvode. Posebne pohvale idu od privrednika na način na koji to mi u Komori radimo, na nastup i predstavljanje na zajedničkoj postavci. Ipak, mora se imati u vidu da je ovo 51. postojanja Jadranskog sajma, da iza organizatora stoji bogati iskustvu i da je zaista veoma značajno predstaviti se na jednoj ovakvoj manifestaciji“, izjavio je Almir Mešić sekretar Udruženja za građevinstvo i industriju građevinskog materijala Kantonalne privredne komore Tuzla.

Kako je istakao, sajam platforma bila je i ove godine prilika da izlagači predstavljaju svoje proizvode i steknu uvid u ono što je aktuelno i inovativno u ovoj industriji. Da kroz integrisani pristup ponude cjelovita rješenja enterijera i eksterijera za objekte različitih namjena iz svih oblasti građevinske djelatnosti: visokogradnje, niskogradnje, izgradnje i održavanje objekata, okova i bravarije, sanitarne galanterije, inženjeringa i projektovanja.

„Sa sigurnošću se može potvrditi da je to bila još jedna izuzetno kvalitetno organizovana i posjećena međunarodna poslovna manifestacija. Ovaj sajam je jedan od najznačajnijih privrednih događaja u grani građevinarstva na širem području, što opravdava i kontinuitet od 41 godine održavanja ovog sajma. Poslovni efekt koje pruža sajam, prepoznat je kao mogućnost izlagačima iz regiona i šire za ulazak na tržište Crne Gore i uspostavljanje privredne

saradnje i direktan pristup ključnim kupcima. Sajam ima međunarodni karakter, pristni su vodeći brendovi, organizovani su nastupi regionalnih i državnih Privrednih Komora, asocijacija i agencija, i sve zajedno daje sliku jednog veoma kvalitetnog sajma“, rekao je sekretar Mešić.



Udruženje za građevinarstvo i industriju građevinskog materijala Kantonalne privredne komore Tuzla organizovalo je i obezbijediti nastup pet firmi članica Komore. U Budvi su se predstavili, ostvarili nove kontakte, dogovorili nove saradnje i poslovne poteze, firme „Tehnograd company“ Tuzla, „Wortmann metal“ Tinja, „Tehna“ Gračanica, „Annoa“ Tuzla, „Yavuz“ Srebrenik, „Lovic & Co“ Bistarac i „Tuzla kvarc“.

Budvanski sajam građevine je mjesto susreta struke i nauke, gdje se i na taj način učesnicima nudi mogućnost za snažnije povezivanje sa domaćim i ino - partnerima u poslovnom ambijentu. Međunarodni karakter Sajma potvrđuje kako prisustvo vodećih brendova, tako i organizovani nastupi regionalnih i državnih Privrednih komora, asocijacija i agencija. Firme članice Komore koje su izlagale u Budvi, izrazile su interesovanje za nastup na zajedničkom komorskom izložbenom prostoru i naredne godine.

Imajući u vidu značajne infrastrukturne projekte, modernizaciju i uvećanje industrijskih kapaciteta širom regiona, u istom terminu ponudu su ove godine prikazali i izlagači specijalizovanih „Sajmova energetike“ i „Vode, vodovodi i sanitarne tehnologije“ što je obogatilo sajam dane u Budvi.

D.K.



„Privreda TK“ u Brčkom

Održan 2. sajam „BOSP-EXPO“ u Brčkom

1. Summit mladih poduzetnika



U okviru projekta Nexus 2019. u organizaciji Udruženja Mreže mladih poduzetnika „LUX“ i firme „SAJAM-EXPO“ u Brčkom je održan 2. Međunarodni sajam poduzetništva i obrta „BOSP-EXPO“ 2019 i 1. Summit mladih poduzetnika. Benjamin Nuhanović, predsjednik Mreže mladih poduzetnika Lux BiH je kazao kako Prvi Summit mladih poduzetnika i BOSP EXPO, donosi mnogo noviteta u 2019. godini. Podsjetio je na činjenicu da je prije godinu dana s radom počelo Udruženje mladih poduzetnika, koje danas broji više od 100 članova te iza sebe ima nekoliko projekata. Saradnja je, kako je naglasio, uspostavljena s udruženjima iz Hrvatske, Srbije i Crne Gore. Organizirane su i konferencije u Mostaru, Gračanici i Tuzli, u okviru kojih su počeli ispunjavati misiju udruženja, koja se odnosi na povezivanje mladih poduzetnika u BiH i cijeloj regiji. Slijedeći pozitivna iskustva najavio je da na Nexusu predstavljaju i osnivaju mrežu mladih poduzetnika četiri države.

„Ovakvim načinom djelovanja šaljemo poruku cijelom regionu da mi možemo i moramo raditi zajedno. Mladi su snaga koja mora ostati na našim prostorima i zajedno ćemo se boriti da napravimo atmosferu gdje će mladi ljudi vidjeti svoju perspektivu na lokalnom i regionalnom tržištu“, poručio je Nuhanović.

Direktorica sektora za edukaciju Vanjskotrgovinske komore BiH Elma Kovačević – Bajtal podržala je održavanje jednog ovakvog događaja, naročito jer ga organiziraju mladi ljudi na kojima kako kaže svijet ostaje.

Dodala je kako mladima moramo dati podršku u uzimanju svoje budućnosti, ali i budućnosti svih nas u vlastite ruke.

„VTK BiH je spremna da bude most između privrednog i javnog sektora, vanjskih, unutrašnjih i inostranih faktora, kao i svih onih koji imaju za cilj razvoj BiH“, kazala je Bajtal, te naglasila kako ovakvim sajmovima kucamo na vrata naše europske budućnosti.

Visoki predstavnik u BiH Valentin Inzko kazao je da Bosna i Hercegovina mora ubrzati ekonomski napredak, a mladi moraju biti pokretačka snaga.

Kazao je kako su ovakvi događaji svima nama inspiracija i oni pozivaju na suradnju, povezivanje, partnerstvo sa svima koji su spremni da udruže snage ka zajedničkom cilju, jer BiH ima puno potencijala, da bude Švicarska, a Hercegovina mala California.

Predsjedavajući vijeća ministara BiH Denis Zvizdić izrazio je svoje zadovoljstvo što prisustvuje jednom ovakvom događaju koji uvezuje mlade ljude BiH i regiona. Rekao je da je mladim ljudima potrebna podrška naročito u vremenu kada je aktualan problem odlaska iz BiH i regiona, te istu mogu očekivati dok je on na čelu Vijeća ministara. U fokusu sajma ove godine bili su mladi poduzetnici, investicije i povezivanje s firmama regije, stoga je u okviru projekta Nexus organizovan je Summit mladih poduzetnika koji je, kako je izjavio organizator, okupio više od 300 mladih poduzetnika iz Srbije, Hrvatske, Crne Gore i Bosne i Hercegovine. Cilj je stvaranje održive mreže mladih poduzetnika regije, i rad na sprečavanju odlaska mladih iz Bosne i Hercegovine i zemalja regije.



Na ovoj značajnoj sajamskoj manifestaciji, Kantonalna privredna komora Tuzla je obezbijedila izložbeni prostor za svoje članice. Na zajedničkom izložbenom prostoru pod nazivom „Privreda TK“, predstavljeni su:

Turistička agencija „BNS“ Srebrenik, „Piemonte“ Tuzla - PJ „Prima VIP“ Orašje, Svadbena salon „Ljubavna priča“ Tuzla, „MamaMia Origins Steak & Wine Restaurant“ Tuzla, Hotel „Vidikovac“ Divič - Zvornik, Hotel „Tehnograd“ Tuzla, „Cisp Italija“ predstavništvo Tuzla, Turistička agencija „Golden tours“ Tuzla, „Tehna“ Gračanica, „Radius“ Gračanica, „Annoa“ Tuzla, „Lović & CO“ Lukavac, „Wortmann Metal“ Tinja, „GiKiL“ Lukavac, „Borplastika“ Tuzla

D.K.



„Privreda TK“ na sajmu u Bihaću...

Održan 17. međunarodni sajam ekologije 'EKOBIS 2019'

270 izlagača iz Turske, Srbije, Hrvatske, Slovenije, Slovačke, Njemačke, Austrije i Bosne i Hercegovine - Najkvalitetniji prateći program dosada
- Značajan organizacijski i sadržajni napredak



Ovogodišnji 17. međunarodni sajam ekologije "EKOBIS 2019" otvoren je porukom premijera Unsko-sanskog kantona Mustafe Ružnić da je sajmište Luke u Bihaću sada idealno mjesto za razvoj poslovnog ambijenta u ovom dijelu Bosne i Hercegovine. „Naš primarni cilj mora biti upravo stvaranje povoljnijeg poslovnog ambijenta, kako bismo sačuvali svakog čovjeka, jer su ljudi naše najveće bogatstvo. Nema boljeg mjesta za uspostavljanje poslovnih partnerstava i međuregionalne saradnje od sajmova ovakvog tipa. Zato bezrezervno podržavamo EKOBIS i nastojimo ga unaprijediti iz godine u godinu“, riječi su kantonalnog premijera Mustafe Ružnić. Sajam je svojim sadržajem i pratećim događajima ove godine bio posvećen cirkularnoj ekonomiji. Posjetiocima se predstavilo 270 izlagača iz Turske, Srbije, Hrvatske, Slovenije, Slovačke, Njemačke, Austrije i Bosne i Hercegovine. „Ove godine imamo pravo bogatstvo kada je u pitanju izložbeni prostor. Tu je puno novih izlagača, partnera za naše privrednike i vjerovatno najkvalitetniji prateći program dosada. Svi su primijetili značajan organizacijski i sadržajni napredak, što nam je na kraju krajeva i bio glavni cilj“, naglasio je predsjednik Privredne komore USK Enes Ružnić.

Grad Bihać je i ove godine bio partner Sajma, pa je posebna pažnja usmjerena na prezentacije projekata aerodroma u gradu na Uni, Lječilišta Gata, te brojnih turističkih i poljoprivrednih potencijala. „Ako bi tražili pet najprepoznatljivijih događaja u našem gradu, onda je EKOBIS sigurno u toj grupi. Ponosni smo na njegovu kvalitetu i tradiciju, te s razlogom možemo reći da je razlog za optimizam. EKOBIS je najjednostavnije rečeno izvanredna privredno - turistička promocija Bihaća i našeg kantona“, kazao je bihački gradonačelnik Šuhret Fazlić. Ovogodišnji grad - partner Sajma bio je Bjelovar, s kojim Privredna komora USK, ali i konkretno ovaj dio BiH imaju dobru saradnju i poslovnu vezu.

„Već dugo godina razvijamo i negujemo gospodarske odnose na dobrobit građana i Bihaća i Bjelovara. Mi smo tu uvijek zastupljeni i posebno nam se dopada što je na sajmu uvijek prisutno mnogo lokalnih - domaćih proizvođača. To je najveća vrijednost ovog sajma“ rekao je zamjenik gradonačelnika Bjelovara Igor Brajdić.



Tema ovogodišnje Međunarodne konferencije o regionalnoj saradnji bit će cirkularna ekonomija, sa posebnim akcentom na poveznicu zaštite okoliša i ekonomske dobiti. Iz programa pratećih sadržaja može se izdvojiti i Prezentacija projektnih aktivnosti "SAVA - ties" - "Očuvanje staništa, uticaj i upravljanje invazivnim vrstama", te Panel diskusija "Cestovno povezivanje Unsko-sanskog kantona sa Sarajevom".



Kantonalna privredna komora Tuzla je za svoje članice i ove godine obezbijedila izložbeni prostor i organizovala zajedničku postavku pod nazivom "Privreda TK". U sajmu u Bihaću, privredno Tuzlanskog kantona na zajedničkom izložbenom prostoru predstavljaju "Eko život" Tuzla, TA "Golden tours" Tuzla, "Radius" Gračanica, "Imel" Lukavac, "Alpha smart energy" doo Tuzla, Svadbeni salon "Ljubavna priča" Tuzla, "FINra" Tuzla, "Lović & CO" Lukavac.

► Održana večer pokrovitelja, sponzora i izlagača - Priznanja najboljim u nekoliko kategorija -



U okviru 17. međunarodnog sajama ekologije "EKOBIS 2019" sinoć je u prekrasnom ambijentu hotela Kostelski Buk održana tradicionalna večer pokrovitelja, sponzora i izlagača u okviru koje su dodjeljene godišnje nagrade i priznanja. Predsjednik Privredne komore USK Enes Ružnić prisutnima se zahvalio na dosadašnjoj podršci, s nadom da ona i dalje neće izostati, te najavio novitete kada je organizacija narednog sajma u pitanju. "U narednom periodu predstoji nam mnogo posla ali ono što znamo jeste da će naredni sajam biti u jednom potpuno novom ambijentu te da će za nijansu biti bolji i drugačiji od ovih do sada", kazao je Ružnić.

Premijer Unsko-sanskog kantona Mustafa Ružnić se također obratio prisutnima, zahvalivši se Privrednoj komori USK na ovako uspješnom sajmu, zahvaljujući kojoj je poslana jedna lijepa slika BiH u svijet.



Priznanja najboljim dodijeljena su u nekoliko kategorija. Posebno priznanje za podršku 17. međunarodnom sajmu ekologije – EKOBIS 2019 dobila je Vlada Unsko – sanskog Kantona na čelu sa premijerom Mustafom Ružnićem, Grad Bihać i gradonačelnik Šuhret Fazlić, Vanjskotrgovinska/ Spoljnotrgovinska komora BiH i predsjednik Nemanja Vasić, Privredna/Gospodarska komora FBiH i predsjednik Marko Šantić, Federalno Ministarstvo poljoprivrede, vodoprivrede i šumarstva na čelu sa ministrom Šemsudinom Dedićem, Federalno ministarstvo razvoja, poduzetništva i obrta ministar Amir Zukić i Ministarstvo vanjske trgovine i ekonomskih odnosa BiH zajedno sa ministrom Mirkom Šarovićem. Nagrade su dodijeljene i za kvalitet živežnih namirnica EKOBIS 2019. Dobitni cu su Ljekovito Bilje Orhideja, BIHAĆ za biljnu čajnu mješavinu, IPM – Institut za prirodnu medicinu Bihać i njihovi kapi života ali i Domaća radinost Braško, Bihać za domaću trahanu bez aditiva i konzervansa. Nagrada za najbolje uređen unutrašnji prostor pripala je kompaniji BH Telecom dd, Sarajevo. Za najbolje uređen vanjski prostor nagradu je odnijela Forma – Garden Tools doo, Sarajevo. Priznanje za ukupan dojam nastupa i prezentaciju proizvođača pripalo je JP Ceste Federacije BiH doo, Sarajevo, Meggle Mljekari doo, Bihać i Udruženju „Žene Sa Une“, Bihać. Za najbolju turističku ponudu nagradu je odnijela Sava Turizem dd, Ljubljana a za najuspješniji kolektivni nastup Vlada Županije Posavske.

D.K.



„Privreda TK“ u Bijeljini...

18. međunarodni poljoprivredni sajam „Interagro“ Bijeljina

Učesnici iz Srbije, Hrvatske, Crne Gore, Mađarske, Italije, Austrije i Turske
- Predstavljena i izložba meda, medonosnih rakija i alkoholnog pića



U Bijeljini je održan 18. međunarodni poljoprivredni sajam „Interagro“. Tradicionalno su na ovoj sajmskoj manifestaciji izlagali predstavnici Kantonalne privredne komore Tuzla, tačnije, firme članice okupljene u komorsko Udruženje za poljoprivredu i prehrambenu industriju.

Predsjednik Privredne komore Vojvodine Boško Vučurević istakao je na otvaranju „Interagra“ da ovaj sajam doprinosi jačanju privredne saradnje i stvaranju ambijenta za brže kontakte među partnerima u regionu.

Predsjednik Privredne komore Republike Srpske Borko Đurić ukazao je na veliku podršku Vlade poljoprivredi, ističući da je ulaganje u ovaj prirodni resurs ulaganje u snažnu Republiku Srpsku. Uz domaće izlagače najnovija dostignuća u agrobiznisu na „Interagru“ predstavljaju učesnici iz Srbije, Hrvatske, Crne Gore, Mađarske, Italije, Austrije i Turske, a biće zastupljeni svi segmenti poljoprivredne proizvodnje. Direktor bijeljinskog preduzeća „Grad“ Slaviša Cacanović izjavio je da postoji namjera da sadašnji sajamski prostor u gradu preraste u master-centar. Na bijeljinskom sajmu je predstavljena i izložba meda, medonosnih rakija i alkoholnog pića, te izložba poljoprivredne mehanizacije sa eksponatima vrijednim 10 miliona KM a postavljena je i izložba kvalitetne priplodne stoke i štandovi sa sjemenskom robom, zaštitnim sredstvima, stočnom hranom, sadnicama i proizvodima prehrambeno prerađivačkih kapaciteta.



Inače, svečano je 18. međunarodni sajam poljoprivrede „Interagro“ u Bijeljini otvorio predsjednik Vlade Republike Srpske Radovan Višković. Istakao je da Srpska u ovoj godini ima rast od pet odsto poljoprivredne proizvodnje i prihoda od poljoprivrede u odnosu na prethodnu godinu.

„Poljoprivreda je jedna od razvojnih šansi Republike Srpske u kojoj 140.000 domaćinstava ostvaruje određeni prihod u ovoj oblasti, a 40.000 domaćinstava registrovani su kao poljoprivredna gazdinstva“, rekao je Višković na otvaranju Sajma „Interagro“ koji je okupio rekordnih 160 izlagača.

Premijer je naveo i da kroz tri stuba ulaganja u poljoprivrednu proizvodnju Republika Srpska ove godine izdvaja 190 miliona KM. **„Očekujemo da poljoprivreda u budućnosti bude u još boljoj poziciji, a sada je već jedan od glavnih stubova razvoja Republike Srpske“,** poručio je Višković. On je izrazio nadu da će, uz veliku podršku Privredne komore Vojvodine, Poljoprivredni sajam u Bijeljini baštiniti dobra iskustva uticajnog Novosadskog sajma. Početku trodnevnog Sajma poljoprivrede u Bijeljini prisustvovao je i pomoćnik ministra poljoprivrede, šumarstva i vodoprivrede Republike Srpske Zoran Maletić, koji je ukazao na značaj agrara u Srpskoj i regionu, kao i potrebu da sajamske manifestacije budu kreator poslovne budućnosti.

„Sajam je mjesto za promociju najnovijih dostignuća u agrobiznisu jer se treba stalno prilagođavati novinama i potrebama poljoprivrednika“, naveo je Maletić.

Međunarodni sajam poljoprivrede „Interagro“ održavao se u sajamskoj hali i na otvorenom prostoru Agrotičnog centra, na površini od 4.500 metara kvadratnih. Organizator Međunarodnog sajma poljoprivrede „Interagro“ u Bijeljini je preduzeće „Grad“, ovogodišnji partneri bili su Privredna komora Vojvodine i Privredna komora Republike Srpske, a pokrovitelji Ministarstvo poljoprivrede, šumarstva i vodoprivrede i grad Bijeljina.

D.K.



Dženana Hodžić, analitičar u oblasti građevinarstva...

„Uprkos nedostatku kadrova, pozitivni trendovi u građevinarstvu“

Hodžić, koja je zastupnica u Federalnom parlamentu, naglašava da je najveći problem u svim privrednim granama u BiH, a posebno u građevinarstvu, nedostatak stručne radne snage



Statistički podaci prema kojima je došlo do povećanja izvršenih i ugovorenih poslova građevinskih preduzeća iz Federacije BiH u inostranstvu svakako su dobar pokazatelj kretanja u ovom sektoru – izjavila je za Fenu ekonomski analitičar u oblasti građevinarstva Dženana Hodžić. Vrijednost ugovorenih građevinskih radova kompanija iz Federacije BiH u inostranstvu bila je veća za 6,1 posto, a izvršenih radova za 3,3 posto u prvom polugodištu ove godine u poređenju sa istim periodom lani. Prema podacima Federalnog zavoda za statistiku, od ukupne vrijednosti izvršenih radova u inostranstvu najveći dio se odnosio na zemlje Evrope i to 97,8 posto. **„Nastavljen je trend investiranja u zemljama EU na koje se najvećim dijelom odnose poslovi naših preduzeća. Novac se nudi po niskoj cijeni u odnosu na štednju, tako da se u narednom**

periodu predviđa još veći priliv investicija u privredu zemalja EU“, navela je Hodžić.

Kako je dodala, veći dio radova se odnosi na niskogradnju, a s obzirom na veliki priliv stranih državljana u pojedine zemlje Evropske unije, posebno u Njemačku, doći će povećanja potreba za stambenom gradnjom radi smještaja doseljeničkog stanovništva. Hodžić, koja je zastupnica u Federalnom parlamentu, naglašava da je najveći problem u svim privrednim granama u BiH, a posebno u građevinarstvu, nedostatak stručne radne snage. **„To je problem koji je sve izraženiji i može dovesti u pitanje našu konkurentnost. Na tržištu rada postoje suficitarna zanimanja, koja i dalje proizvodimo, dok smo, s druge strane, u problemu sa deficitom kadrova određenih zanimanja, kao što su zanimanja u građevinarstvu, gdje je posljednjih godina interes za upis i školovanje u značajnom padu“,** navela je Hodžić.



Za rješavanje ovog problema Hodžić smatra da je neophodno da Federalno i kantonalna ministarstva obrazovanja i nauke u saradnji, i u okviru svojih nadležnosti, izvrše korekcije upisne politike učenika i studenata na način da se obustavi njihov upis za zanimanja koja su suficitarna na tržištu, te osigura podsticaj za upis učenika i studenata za deficitarna zanimanja.

D.K.



Rasterećenje privrede...

Tema konačno stavljena na dnevni red političkih razgovora

Iz UPFBiH naglasili potrebu što hitnijeg usvanja izmjena i dopuna Zakona o zdravstvenom osiguranju FBiH



Udruženje poslodavaca Federacije Bosne i Hercegovine zatražilo je podršku od predsjednika Hrvatske demokratske zajednice BiH i Hrvatskog narodnog sabora BiH Dragana Čovića i HDZ BiH za donošenje Zakona o doprinosima FBiH u kojoj će biti zakonski regulirana obaveza Vlade FBiH da se u narednim godinama smanjuju stope doprinosa u skladu sa rastom prihoda. UPFBiH je već dostavio amandmane na Vladin Prijedlog zakona o doprinosima FBiH svim zastupnicima i svim zastupničkim klubovima u Zastupničkom domu Parlamenta FBiH, čije je zasjedanje zakazano za 09. oktobar/listopad 2019. godine.

“Zahvalni smo gospodinu Čoviću sa kojim razgovaramo o ključnim zakonskim rješenjima iz naše “Inicijative 20+5+6” treći put u posljednjih mjesec dana i koji je pokazao razumijevanje za naše zahtjeve. UPFBiH intenzivno komunicira sa svim parlamentarnim političkim strankama u FBiH. Osim izmjena Zakona o doprinosima, insistiramo na usvajanju izmjene Zakona o porezu na dobit FBiH u smislu da se reinvestiranje dobiti oslobodi plaćanja poreza na dobit, a da se oporezuje dividenda sa 10 posto. U prijedlogu Zakona o porezu na dohodak koji je predložila Vlada FBiH se oporezuje dividenda sa 10 posto, ali bez izmjena i dopuna Zakona o porezu na dobit FBiH u skladu sa našim prijedlogom, radi se o još jednom opterećenju koje će direktno opteretiti poslodavce”, kazao je Adnan Smailbegović, predsjednik Udruženja poslodavaca FBiH nakon sastanka sa Čovićem.

Predsjednik HDZ BiH istaknuo je da je tema rasterećenja privrede konačno stavljena na dnevni red političkih razgovora i dogovora.

“Zahvaljujem poslodavcima na redovnoj komunikaciji koju smo uspostavili i mislimo da je to pravi put ka iznalaženju rješenja koja će u konačnici dovesti do povećanja plaća, povoljnijih uvjeta za ulaganje kako domaćih, tako i inozemnih ulagača i smanjenja sive ekonomije. Od

izuzetne je važnosti dijalog između predstavnika realnog sektora na jednoj i predstavnika izvršne i zakonodavne vlasti kako bi se došlo do rješenja koja će na jednoj strani rasteretiti gospodarstvo, a na drugoj strani neće dovesti u pitanje stabilnost proračunskih prihoda i vanproračunskih fondova”, istaknuo je Čović.



Također, iz UO UPFBiH insistiraju da se hitno formiraju koordinaciona tijela za parafiskalne namete kako na nivou FBiH, tako i nivou kantona i općina kako bi se radilo na njihovom ukidanju ili smanjenju. Istaknuto je da u ovome trenutku u FBiH, na svim nivoima vlasti ima više od 3.200 parafiskalnih nameta. Iz UPFBiH su, kao posebno značajno naglasili potrebu što hitnijeg usvanja izmjena i dopuna Zakona o zdravstvenom osiguranju FBiH u smislu da se poslodavci rasterete plaćanja bolovanja u trajanju od 42 dana i da se taj period smanji na 15 dana, dok bi ostatak naknade za bolovanje išao na teret fondova zdravstvenog osiguranja.

► Komora podržava aktivnosti na rasterećenju privrede

Kantonalna privredna komora Tuzla, kao asocijacija privrednika industrijski i izvozno najznačajnijeg kantona u Federaciji BiH, razmatrala je set zakona iz oblasti javnih finansija u Federaciji



BiH koji su poslani u parlamentarnu proceduru, a posebno Prijedlog Zakona o doprinosima, Prijedlog Zakona o porezu na dohodak i Zakon o porezu na dobit.

Jedinstven stav je da podržavamo sve aktivnosti koje se provode u cilju rasterećenja privrede, stvaranja povoljnijeg poslovnog ambijenta i zadržavanja radne snage u našoj zemlji, a posebno:

- povećanje neoporezive osnovice na 800 KM, kao i proširenje porezne osnovice za naknade koje nemaju karakter plate i povećanje stope poreza na dohodak sa 10% na 13%.
- smanjenje doprinosa na 32,5% ali i stav UP FBiH da se u Zakonu predvidi kontinuirano smanjenje stope doprinosa u skladu s povećanjem budžetskih prihoda, što bi bilo značajno rasterećenje privrede.
- neophodno je obezbijediti porezne olakšice za reinvestiranje dobiti tj. oslobađanje od poreza reinvestiranog dijela profita, koje sadašnjim Zakonom o porezu na dobit nije predviđeno, a koje će stimulirati privrednike da ulažu u proširenje svog poslovanja.
- kontinuirano raditi na povećanju minimalne plaće u Federaciji BiH kako bi se poboljšao kvalitet života i

sprječio odlazak radne snage.

- kontinuirano raditi na smanjenju i ukidanju parafiskalnih nameta u Federaciji BiH koji dodatno opterećuju poslovanje privrednih subjekata.



Kantonalna privredna komora Tuzla je spremna, u saradnji sa resornim institucijama, dati svoj maksimalni doprinos realizaciji svih aktivnosti koje će rezultirati rasterećenjem privrede i stvaranjem privrednog okruženja koje će doprinosti razvoju Tuzlanskog kantona i Bosne i Hercegovine.

„Privreda ispašta zbog neformiranja vlasti“

Vasić: “Zbog zastoja u formiranju vlasti na čekanju su i mnoga radna mjesta“ – Jašarspahić: „postoje osobe pri ministarstvima koje su zadužene za rad sa predstavnicima privrednih udruženja“

I dok se stranke koje su voljom građana BiH prije godinu dana dobile najviše glasova međusobno optužuju ko je kriv za neformiranje vlasti na nivou BiH i FBiH, privreda, kako ističu njeni predstavnici, ispašta i trpi posljedice zbog toga. Podsjećamo, nedavno je bila godina dana od kada su održani posljednji opšti izbori i nakon toga silni pregovori i dogovori u vezi sa formiranjem vlasti završili su neslavno. Zbog toga veliki broj sporazuma i ugovora čeka potpis i ratifikaciju u parlamentu BiH, nema ni budžeta institucija BiH za ovu godinu (na snazi privremeno finansiranje), investicije od dvije milijarde KM su na čekanju, nema novaca od MMF-a, BiH je jedina članica bez delegacije u Vijeću Evrope, a i u zastoju smo sa EU integracijama. Formiranje vlasti na nivou BiH zapelo je u vezi sa izborom mandatar za sastav Vijeće ministara, jer Željko Komšić, predsjedavajući Predsjedništva BiH, i njegov bošnjački kolega Šefik Džaferović uslovljavaju imenovanje kandidata (Zoran Tegeltija, bivši ministara finansija RS) slanjem ANP-a u Brisel, dok Milorad Dodik, srpski član, ne želi da pristane na to. Nedavno je i Dodik rekao da će usloviti formiranje vlasti time da strane sudije odu iz Ustavnog suda BiH.

Nemanja Vasić, predsjednik Vanjskotrgovinske komore BiH, kaže za “Nezavisne” da je privredni i poslovni sektor taj koji najviše trpi zbog neimplementacije izbornih rezultata i zbog toga što ne funkcioniše Parlamentarna skupština BiH. Ističe da veliki broj ugovora i ratifikacija sporazuma čeka na potpis, a da parlament BiH blokira dvije milijarde KM koje bi omogućile da privrednici u BiH budu konkurentni i idu za kolegama u susjedstvu.



“Zbog zastoja u formiranju vlasti na čekanju su i mnoga radna mjesta, a tužno je i neshvatljivo to što se politika stavlja ispred privrede i ekonomije”, kaže Vasić.

Mirsad Jašarspahić, predsjednik Privredne komore FBiH, za “Nezavisne” ističe da postoje osobe pri ministarstvima koje su zadužene za rad sa predstavnicima privrednih udruženja, ali i firmi, te da tu ne bi trebalo da ima uticaj to što još nema nove vlasti. I dok privrednici apeluju na političare da se vlast formira, predstavnici političkih partija i dalje različito gledaju na ovaj problem.

D.K.



Agencijske vijesti...

U Zenici svečano otvoren Bau centar "Zeka Comerc"



U Zenici je svečano otvoren Bau centar "Zeka Comerc". Firma Zeka-comerc d.o.o. osnovana je 1995. godine kao trgovina koja se za relativno kratko vrijeme razvila u kompaniju. Bau centar Zeka Comerc posjeduje razgranatu mrežu u oblasti trgovine, prijevoza i drugih uslužnih djelatnosti i upošljava više od 200 radnika. Četvrti Bau centar u Zenici prostire se na površini od 3500 m² na lokaciji Kamberovića čikma bb. Kupcima je na raspolaganju široka ponuda alata, vodomaterijala, elektromaterijala, bijele tehnike, robe za zabavu i rekreaciju i sve što je potrebno svakom domaćinstvu. Nastavak aktivnosti u okviru obilježavanja Svjetskog dana turizma.

TZTK: Obilježavanje Svjetskog dana turizma



Povodom nastavka obilježavanja Svjetskog dana turizma sa posebnim motom: "Turizam i radna mjesta, bolja budućnost za sve", na inicijativu TZTK, upriličen je sastanak u Turističko ugostiteljskoj školi Tuzla. Sastanku su prisutvovali: savjetnica TZTK doc.dr.sc. Merima Alijić, direktor Turističko-ugostiteljske škole gospodin Jasmin Imamović, pedagog Alija Mrkonjić, profesorice: Svetlana Bogdanović Kuret i Miranda Cvijanović.

Radni sastanak je imao za cilj da se mladom, budućem turističko ugostiteljskom kadru, prezentiraju procesi rada u ugostiteljskom objektu, što je rado prihvaćeno od menadžementa turističko ugostiteljske škole. Dogovoreno je da će se 03.10. 2019.godine obaviti posjeta kompaniji "Uni Bristol – hotel Melain. Laganom šetnjom do hotela bit će posjećana i autetična mjesta gradske jezgre Tuzla sa kratkom prezentacijom. U narednim danima, povodom dana "Otvoreni vrata", Turistička zajednica biti domaćin učenicima Turističko-ugostiteljske škole, gdje će učenici moći dobiti informacije o turističkim resursima našeg kantona.



7. oktobar – Svjetski dan dostojanstvenog rada

Od 2008. godine Međunarodna konfederacija sindikata (ITUC) obilježava 7. oktobar kao Svjetski dan dostojanstvenog rada. Tog dana radnici širom svijeta ovaj dan obilježavaju kao simbol borbe za sigurnost radnog mjesta, redovne plate, zdravstvenu, socijalnu i penzijsko-invalidsku zaštitu, mogućnost organizovanja u sindikate radi zaštite svojih interesa, te istinsko uključivanje u socijalni dijalog. Dostojanstveni rad se temelji na uvjerenju da su za stvaranje najboljih perspektiva za društveni napredak i razvoj nužne sve četiri njegove komponente: zapošljavanje, prava, zaštita i dijalog. Svi ljudi imaju pravo na rad, na dobre uslove rada i na dovoljno primanja za svoje osnovne ekonomske, socijalne i porodične potrebe, a to pravo bi trebalo provoditi osiguravanjem prikladnih plata za život. Svi radnici imaju pravo na osnivanje i pristupanje sindikatima te na kolektivno pregovaranje sa svojim poslodavcima, a sve međunarodne organizacije, vlade i preduzeća moraju ispuniti svoja obećanja da će poštovati ljudska prava radnika. Nažalost, radnici i radnice u Bosni i Hercegovini i ovaj 7. oktobar, kao i prethodnih godina, dočekali su u zemlji u kojoj ljudi svakodnevno ostaju bez posla, sve je veći broj onih koji za svoj rad ne primaju platu, socijalni dijalog praktično ne postoji na na državnom i nivou Federacije BiH, na sceni je egzodus radno-sposobnih ljudi u zemlje Zapadne Evrope, a još uvijek smo plodno tlo za sve one koji žele kršiti ljudska i radnička prava zaposlenih, zemlja u kojoj postaje normalno da ljudi rade 'nacрно', da nemaju zdravstvenu zaštitu, da rade subotama i nedjeljama bez naknade, da radni dan traje i po 15 sati. Ukoliko ne žele ostati u potpunosti bez radne snage i onih koji redovno svojim doprinosima i porezima pune budžete, vlasti se odmah i bez odlaganja moraju uhvatiti ukoštac sa svima onima koji vjeruju da su iznad zakona i da ne moraju poštivati radnička i ljudska prava, navode iz Saveza samostalnih sindikata BiH.

D.K.

Poslovni forum BiH – Španija...

„Željeznice u BiH imaju probleme, ali i perspektive“

“Trend u Evropi je da se finansiraju željeznice kao najpovoljniji, ekološki tip prijevoza“



Najveći problem željeznica u BiH je uništena i loša infrastruktura, ali uprkos i drugim problemima ovaj sektor ima perspektivu, posebno u teretnom saobraćaju - istaknuto je u Vanjskotrgovinskoj komori BiH u Sarajevu na Poslovnom forumu BiH – Španija koji je posvećen razvoju željezničkog transporta. VTKBiH je, po riječima predsjednika Nemanje Vasića, Forum organizirala u saradnji sa Španskim institutom za vanjsku trgovinu i investicije (ICEX) i uz podršku Ambasade Kraljevine Španije u BiH. **“Španija je zemlja u EU koja ima dosta dobro razvijen željeznički saobraćaj, a njihovi stručnjaci su u mnogim zemljama, koje su bile kao i mi sa nerazvijenim željezničkim saobraćajem, doprinijeli svojim znanjem i iskustvima da se taj saobraćaj popravi i da dostigne koliko, toliko nivo zemalja EU. Mi smo naravno daleko od toga i naš željeznički saobraćaj je u lošem stanju. Pošto je ovo izuzetno važna grana privrede nadamo se da će i ovaj skup doprinijeti da se sve to pokrene sa mrtve tačke”**, kazao je Vasić.

Ambasador Kraljevine Španije u BiH José María Valdemoro Giménez je kazao da sektor željezničkog transporta doživljava značajan razvoj na globalnom nivou kao alternativa već prezasićenim sektorima cestovnog i avionskog saobraćaja.

“Španija je uložila velike napore u razvoj svoje infrastrukture, te učestvovala na međunarodnom nivou u tom razvoju i ovdje smo danas da podijelimo iskustva sa BiH. Sa nama su predstavnici devet značajnih španskih kompanija aktivnih i uspješnih u različitim aspektima željezničkog transporta da ovdje podijele svoja iskustva i sagledaju potencijalne izazove na koje može naići razvoj željezničkog saobraćaja u BiH”, kazao je španski ambasador.

Dodao je da Španija ima izrazito dobro razvijen željeznički saobraćaj sa 15.000 kilometara željeznica i 3.000 kilometara brze željeznice, najdužu i najrazvijeniju mrežu na nivou Evrope i drugu najrazvijeniju na svijetu, odmah iza Kine. Istovremeno, španske kompanije realiziraju veoma značajne projekte na međunarodnom nivou.



Željeznice u BiH, po riječima zamjenika ministra komunikacija i prometa BiH Saše Dalipagića, imaju određene probleme i pri tome nemaju odgovarajuću podršku od institucija i investitora, ali uprkos svemu imaju perspektivu u budućnosti posebno u teretnom prijevozu rasutih i tekućih tereta i prijevozu kontejnera.

“Trend u Evropi je da se finansiraju željeznice kao najpovoljniji, ekološki tip prijevoza i Evropa čak sada daje sredstva za finansiranje željeznica sa grantovima od čak 60 posto, dakle nepovratna sredstva. Mi u BiH, odnosno entitetska ministarstva u čijoj su nadležnosti željeznice, trebale bi da koriste ta sredstva, ali bi prije toga morali

imati odgovarajuće projekte za ta sredstva”, naveo je Dalipagić. Predstavnik Uprave željezničke infrastrukture Španije Joaquín Jiménez naglasio je ulogu ovog tijela u razvoju željezničke infrastrukture u toj zemlji. **“Počeli smo prije 30 godina kada smo identifikovali pravi tajming za željeznički sektor i imali smo priliku da iskoristimo i apsorbuje važne evropske fondove koji su nam pomogli u obnovi i razvoju željeznica”**, kazao je Jiménez.


U okviru Poslovnog foruma o temi "Iskustva i budućni izazovi u razvoju željezničkog transporta" bilo je govora i o aktuelnim i budućim projektima u željezničkom sektoru BiH, kao i o razvoju željeznica Španije, a posebna tema posvećena je modernizaciji sarajevske tramvajske mreže kao ključnom projektu za održivu mobilnost u Sarajevu. Održani su i panel o temi "Finansiranje razvoja transportnog sektora u BiH", te prezentacija tehnologija u željezničkom sektoru Španije, kao i poslovni sastanci (B2B) privrednika iz BiH i Kraljevine Španije.

D.K.



Najava sajmskih manifestacija...

Beograd: 57. sajam nameštaja, 5-10. novembra 2019.



Najveći i najvažniji događaji u Jugoistočnoj Evropi u sferi dizajna, proizvodnje i distribucije nameštaja -57. Međunarodni sajam nameštaja, opreme i unutrašnje dekoracije, uz 57. Međunarodni sajam mašina i alata iz oblasti drvne industrije - i ove jeseni biće mjesto susreta proizvođača nameštaja i distributera, dizajnera, inženjera, arhitekata i šire javnosti.

Šestodnevni renomirani evropski događaj i ove jeseni okupiće poslovne ljude, kompanije posvećene inovacijama, vrhunskom dizajnu, kvalitetu i funkcionalnosti nameštaja. U hali 5 biće izložene mašine i alati, i premijerno predstavljene tehničko - tehnološke inovacije od izuzetne važnosti za drvo prerađivačku industriju. Ovogodišnje izdanje sajma staviće u fokus proizvođače i kompanije okrenute proverenim vrednostima, kao i mlade snage u usponu. Internacionalni karakter Sajam potvrđuje okupljanjem velikog broja poslovnih ljudi, kupaca, arhitekata, dizajnera i distributera iz regiona i svih krajeva Evrope. Veliki broj prestižnih kompanija koje će izlagati ove godine pokazuju da je Beogradski sajam sve atraktivniji i da se nalazi na mapi bitnih evropskih dešavanja. Tokom trajanja sajma posjetioci će imati priliku da pogledaju već poznatu Izložbu mladih dizajnera i da u programu Design Talks prisustvuju razgovorima sa eminentnim učesnicima iz cele Evrope. Vrhunac manifestacije i ove godine predstavljaju dodjela nagrade Zlatni ključ koju će internacionalni žiri dodijeliti najuspješnijim izlagačima za 2019. godinu.

Dobro došli na 57. Sajam nameštaja!
PRESS Beogradskog sajma
Ivana Višković tel: 011 2655 101, 063 395 871
Tamara Vasiljević tel: 011 2655 828, 063 328 169
E mail: press@sajam.rs
Web: sajamnamestaja.rs

Brčko: 18. sajam privrede, 7-9. novembra



Međunarodni sajam privrede/gospodarstva je izuzetna prilika da se na jednom mjestu sretnu veliki broj poslovnih ljudi, razmjene ideje, iskustva i uspostave novi kontakti. Privredna komora Brčko distrikta BiH pod pokroviteljstvom Vlade Brčko distrikta BiH, Vanjskotrgovinske/Spoljnotrgovinske komore BiH, Antunović d.o.o., Bimal, d.d. Brčko i drugih privrednika Brčko distrikta BiH tradicionalno i ove godine organizuje 18. Međunarodni sajam privrede/gospodarstva "Brčko 2019" i to u periodu od 7-9. novembra 2019. godine. Brčanski sajam predstavlja jedan od najznačajnijih privrednih/gospodarskih događaja na našim prostorima, što potvrđuje višegodišnji kontinuitet – tradicija održavanja Sajma, rezultati uspjeha, veliki broj izlagača kako domaćih tako i stranih. Sajam se i ove godine održava na lokaciji bivšeg TC Tropik, u Ul. Petra Kočića bb Brčko distrikt BiH. Ova lokacija se pokazala kao izuzetno pogodna za održavanje ove privredne manifestacije, te vjerujemo da će kontinuitet kvaliteta biti zadovoljen i ove godine. Molimo Vas da već sada planirate Vaše učešće na 18. Međunarodnom sajmu privrede „Brčko 2019“, a mi Vas ljubazno očekujemo i stojimo Vam na raspolaganju za sva dodatna pitanja. Rezervišite i osigurajte svoje mjesto na Sajmu ispunjavanjem prijave-ugovora ili putem sajta:

<http://www.brcko-pkomora.com/Privredna/Gospodarska komora Brčko distrikta BiH>



Sarajevo: 6. Sajam privrede, 43. Sajam roba široke potrošnje, 10-12.12.2019.



Zadovoljstvo nam je obavijestiti Vas da KJP Centar "Skenderija" – Sarajevski sajam organizuje 6. Sajam privrede, poljoprivrede i zanatstva & 43. Sajam roba široke potrošnje. Sajam će se održati u periodu od 10.12. do 12.12.2019. godine. Sajam je dio zvaničnog programa obilježavanja 50. godina od osnivanja KJP Centar "Skenderija" - Sarajevskog sajma. Sajam se održava u gradskoj dvorani „Mirza Delibašić“, na površini

od 3.000 m2 sajamskog prostora, pod motom „DOMAĆI PROIZVOD U SLUŽBI GRAĐANA BiH“. Program manifestacije obuhvata: - Prezentacijski, predstavljanje proizvoda i usluga putem izložbenih prostora - Stručno edukativni (u saradnji sa partnerima Poljoprivredno – prehrambeni fakultet Univerziteta u Sarajevu, Agencija za sigurnost hrane BiH, Savez udruženja organskih proizvođača FBiH i dr.) - Ustupanje termina izlagačima za organizaciju vlastite promocije/prezentacije/predavanja/radionice/panel diskusije/okruglog stola u tehnički opremljenom centralnom prezentacionom prostoru sajma uz prethodnu rezervaciju. Pozivamo Vas da učestvujete na Sajmu - biće to zaista izuzetna prilika da pred brojnim posjeticima promovirate svoj program, ostvarite poslovne ciljeve i osobno zadovoljstvo.

KJP Centar „Skenderija“ d.o.o.
Sarajevski sajam
Menadžer sajma
Bojčić Amira, dipl.ecc.
Tel: +387 33 219 624
E-mail: amira.b@skenderija.ba
www.skenderija.ba

Beograd: 46. sajam građevinarstva “SEEBBE”, 22 – 25.4.2020.



Najveći sajamski događaj u građevinskoj industriji u jugoistočnoj Evropi, Sajam građevinarstva u Beogradu, održaće se od 22. do 25. aprila 2020. godine na Beogradskom sajmu. Specijalizovana je to međunarodna manifestacija koja obuhvata najrazličitije segmente građevinske industrije – od istraživanja i projektovanja, preko izgradnje i održavanja objekata u visokogradnji, niskogradnji i hidrogradnji, do predstavljanja najsavremenijih materijala, građevinskih mašina, uređaja i alata. U potpunosti ga i različiti načini adaptacije, rekonstrukcije i restauracije, kao i promocija starih zanata koji su druga krajnost savremenim informacionim tehnologijama i modernom upravljanju projektima. Kao finalna djelatnost, dio Sajma građevinarstva je i opremanje enterijera. Učesnici manifestacije su svi eminentni domaći i strani građevinski proizvođači, distributeri i trgovci opremom i materijalima.

Oni za posjetioce Sajma svake godine pripreme posebne popuste i specijalne uslove plaćanja proizvoda i usluga. Sajam građevinarstva jedan je od najznačajnijih poslovnih sajmova u Srbiji i regionu, i događaj koji je za sve učesnike i posjetioce idealna prilika i ambijent za premijerna predstavljanja inovacija i tehničkotehnoloških rješenja. Prijavni materijal na www.sajamgradjevine.rs.

BEOGRADSKI SAJAM
Bulevar vojvode Mišića 14, 11000 Beograd, Srbija
Dejana Cahun koordinator projekta Tel: +381 (0)11 2655-248, 2655-899, fax: 2655-219
e-mail: seebbe@sajam.rs

D.K.



Nove članice Komore...

U 2019. godini 9 novih članica
za druga 4 mjeseca



KANTONALNA PRIVREDNA KOMORA TUZLA

Kada je u pitanju članstvo u Kantonalnoj privrednoj komori Tuzla, zadovoljstvo je istaći kako je u 2019. godini nastavljen trend povećanja broja članica. Velikom broju privrednih subjekata koje su potpisale članstvo u Komoru, za druga četiri mjeseca ove godine, pridružilo se njih još devet. Riječ je o sljedećim firmama koje su se odmah po učlanjenju u Komoru, aktivno uključile u rad granskih udruženja te izjavile spremnost za sudjelovanje na sajamskim manifestacijama u okviru zajedničke sajamske postavke pod nazivom "Privreda TK". Sajamske aktivnosti će i u narednom periodu za svoje članice organizovati Kantonalna privredna komora Tuzla a zahvaljujući izuzetno kvalitetnim međukomorskim odnosima u zemlji i široj regiji te podršci Vlade Tuzlanskog kantona. Firme, nove članice Komore su:

"Bosfor" doo Živinice, "Welt Apo doo Tuzla, Etno restoran "Bardak" Đurđevik, "Amasa" Tuzla, "Hifa" doo Tešanj, PGL "Protect" doo Lukavac, "Intral BiH" Tuzla, "Zeka Comerc" doo Gračanica, "Mliječna industrija 99" doo Gradačac.

Izdavanje ATA karneta...

Obračunski period 25.4.2019.-
31.8.2019. godine



U 2019. godini je nastavljeno izdavanje ATA karneta u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla. Podizanje dokumenata vrši se na mjestu gdje je zahtjev i podnesen. "Kada su u pitanju izdati ATA karneti i dodatni listovi u ovoj godini, dakle od 25.04.2019. do 31.08.2019., pristiglo je ukupno 137 zahtjeva. Od toga su bila 74 zahtjeva za izdavanje ATA karneta i 63 zahtjeva za izdavanje dodatnih listova za ATA karnet. Od 74 zahtjeva za izdavanje ATA karneta, 42 zahtjeva su podnijela fizička lica iz sljedećih opština: Kalesija, Zavidovići, Tuzla, Lukavac, Doboj Jug, Bijeljina, Živinice, Šekovići, Srebrenik, Tešanj, Milići, Ugljevik, Zvornik i Sapna, Bratunac, Poljice a 32 zahtjeva su podnijele firme iz Bijeljine, Gračanica, Gradačca, Lukavca, Živinica, Srebrenika, Bratunca, Tuzle, Usore, Kladnja, Sapne, Milić, Čelića, Tešnja i Lukavice. Ukupno 52 fizička lica su podnijeli zahtjev za izdavanje dodatnih listova, a 11 zahtjeva stiglo je iz privrednih društava", izjavila je Edina Kanić Kurtić stručni saradnik za pravne, administrativne i opće poslove - Uredu za pružanje informacija o ATA sistemu i izdavanje ATA karneta Vanjskotrgovinske komore u Tuzli. Sve dodatne informacije, kao i potrebne upute o ATA sistemu i obrasce,

zainteresirani mogu pronaći na web stranici Vanjskotrgovinske komore BiH www.komorabih.ba ili direktno – na osnovu dole navedenih kontakt informacija kao i u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla - Trg slobode bb – 75000 Tuzla - Tel/fax. +387/35/396-556 i Fax:+387/35/369-552, email: atatz@komorabih.ba - kontakt osoba: Edina Kanić Kurtić.

D.K.



Organizator „Imel“ doo Lukavac...

U Lukavcu održana konferencija
"Tech Cruise"

Najveća ict poslovno - tehnička konferencija u Bosni i Hercegovini



Tech Cruise, prva i najveća ICT poslovno - tehnička konferencija u BiH, održana je na jezeru Modrac. Riječ je o događaju koju nudi širu sliku digitalne transformacije, ali i naglašava važnost praćenja trendova u digitalnom svijetu kako bi se izvuklo najbolje od mogućeg te stvorila što veća konkurentnost i benefiti. Konferencija Tech Cruise je unutar tri dana, koliko je trajala, ponudila nova konkretna rješenja i savjete za kreiranje održive poslovne i digitalne kulture unutar kompanija. Više od 300 prijavljenih učesnika imali su priliku slušati više od 50 predavanja raspoređenih u četiri sale, istakli su iz kompanije Imel d.o.o. Lukavac, koja je organizator Konferencije. Poslovno - tehničku konferenciju Tech Cruise otvorio je Denijal Tulumović, premijer Tuzlanskog kantona. On je izrazio svoje zadovoljstvo održavanjem ovako velike poslovno - tehničke konferencije na području Tuzlanskog kantona.

"Ovo je jedinstven IT događaj, i nama u Tuzlanskom kantonu predstavlja posebno zadovoljstvo što je ovakav događaj organiziran upravo ovdje. To također dokazuje da smo mi u Tuzlanskom kantonu svjesni važnosti i okrenuti obrazovanju IT stručnjaka i uopće "linkovanju" stručnjaka u drugim oblastima sa IT ekspertima, vođeni činjenicom da se danas svaka privredna grana oslanja na upotrebu informacijsko-komunikacijskih tehnologija. Očekujemo da ova konferencija stimuliše diskusije o idejama i modelima za razvoj informacijske sigurnosti, visoke tehnologije i novih marketinških platformi, "pametnih" okruženja, tehnologija u nastajanju i multimedijjskih komunikacija. Istovremeno, Konferencija je i prilika da sagledamo gdje se u ovom trenutku nalazimo kao privreda i društvo, koliko smo iskoristili potencijale digitalne ekonomije i u kojoj smo fazi stvaranja digitalnog društva, te kako možemo kvalitetnije i bolje iskoristiti priliku koju nam pruža primjena digitalnih tehnologija", rekao je u uvodnom obraćanju premijer Tulumović



U ime Organizacionog odbora TechCruise obratila se i Amra Brkić, marketing menadžer kompanije Imel d.o.o. koja je naglasila razloge i važnost održavanja konferencije. Riječima dobrodošlice, učesnicima se obratio i Izudin Čeliković, predsjednik uprave kompanije Imel d.o.o. koji je i glavni organizator ovog velikog ICT dešavanja. Svojom prisutnošću i kratkim obraćanjem, konferenciju su također uveličali Edin Delić, načelnik općine Lukavac i Tatjana Vučić, direktorica Bit Alliance. Iz organizacije Tech Cruise konferencije, naglašeno je da ona predstavlja jedinstvenu priliku za B2B i networking među kompanijama, kao i upoznavanje sa dobrim praksama nekih od vodećih BH kompanija iz oblasti proizvodnje,


trgovine, finansija, turizma i uslužnih djelatnosti koje se susreću sa mijenjanjem i transformacijom različitih procesa svih sektora u okviru ekonomije, dajući potpuno drugi pravac i dimenziju u odnosu na tradicionalno poslovanje.

Podršku i učešće TechCruise konferenciji pružili su: DELL EMC, Kaspersky LAB, LENOVO, Huawei, KimTec, Posao.ba, Intellinet, APC, Vertiv, D-Link, QNAP, ComTrade, Lexmark, Microsoft, ASBIS, Centar za poslovnu edukaciju -CPE, NLB Banka, EPSON, Jochen Schwizer MyDays Group, JP Spreča, Gauss, BitAlliance, Adizes South East, Escape, Europska Banka za obnovu i razvoj, Liliium Digital, Lukavac Cement i mnogi drugi.

D.K.



THE CHAMBER OF ECONOMY OF TUZLA CANTON



TUZLA CANTON

Your Business Partner

